

CARTA YEⁿ'E 'IIⁿ'YĀⁿ HEBREOS

Ndyuūs dichó'o yā daiyá yā chi caaⁿ'máⁿ yā lado yeⁿ'é yā

¹ Tiempo chi 'āā chó'ōo, Ndyuūs caⁿ'a yā n'deee cūūví tiempo ndúúcū neené n'deee nááⁿ taachi profetas chi candéé yā nduudu yeⁿ'e Ndyuūs ngaⁿ'á yā lado yeⁿ'é yā.

² Ní maaⁿ ní tiempo 'cūū Ndyuūs dichó'o yā daiyá yā Jesucristo chi ngaⁿ'á yā ndúúcū s'uuúⁿ. Ní Ndyuūs ndúúcū daiyá yā din'dái yā tanducuénⁿ'ē chi véé ní Ndyuūs caⁿ'á yā tanducuénⁿ'ē chi yeⁿ'e daiyá yā.

³ Ní daiyá Dendyuūs miiⁿ ní ngíí n'gai yā yeⁿ'e chidεεvé n'dai yeⁿ'é Ndyuūs. Ní tan'dúúcā Ndyuūs miiⁿ 'āā 'tiicá nūuⁿ daiyá yā. Daiyá yā ní ndúúcū nduudu chi ngaⁿ'a yā, dííⁿ yā chi tanducuénⁿ'ē dendu'ū snéé na lugar yeⁿ'ē. Ní cuayiivi chi daiyá yā dííⁿ yā chi nadach'εεcú yā yeⁿ'e 'iiⁿ'yāⁿ yeⁿ'e nuuⁿndi yeⁿ'é yā tuu'mi ní ch'iindí yā ná va'ai chεeti nguuvi na lado tá cuaacú chiidá yā chi lado yeⁿ'e honor. Ndyuūs miiⁿ ní poder chi ch'εεte ca yeⁿ'e tanducuénⁿ'ē poder.

Daiya Ndyuūs ní ch'εεte ca nguée ti ángeles

⁴ Ní daiya Dendyuūs ní neené ch'εεte ca nguée ti ángeles. Ní chi duuchí yā ndúúcū chi véé yeⁿ'é yā ní neené ch'εεte ca nguée ti ángeles.

5 Caati mar 'áámá vmnéⁿ'ēe nguée^e caⁿ'a Ndyuūs ndúúcū mar 'áámá ángel tan'dúúcā chi ngaⁿ'a yā ndúúcū daiyá yā Jesucristo:

Díí ní daiyá; maaⁿ ca'á vida yeⁿ'é nī.

Ní nguée^e caⁿ'a yā ndúúcū mar 'áámá ángel 'tíicā:

'Úú ní chiida di 'úú; niicu díí ní daiyá dii.

6 Ní taachi Ndyuūs dichó'o yā 'áámá n'dyaⁿ'ā daiyá yā iⁿ'yeeⁿdí 'cūū ngaⁿ'a yā 'tíicā:

Nducyaaaca ángeles yeⁿ'é Ndyuūs canée^e chi dich'εεté yā daiya Ndyuūs.

7 Ní Ndyuūs ngaⁿ'a yā yeⁿ'e ángeles yeⁿ'e yā 'tíicā:

'Úú dííⁿ chi ángeles yeⁿ'é ní tan'dúúcā espíritu s'eeⁿ, 'tiicá yā. Ní dííⁿ chi ángeles dichí'vε yā 'úú. Ní tan'dúúcā 'áámá nguuchi yaⁿ'ā 'tíicā ángeles yeⁿ'é.

8 Naati Ndyuūs ngaⁿ'á yā yeⁿ'e daiya yā Jesucristo 'tíicā:

Dii Ndyuūs, trono yeⁿ'e di ni 'áámá cūnee. Ní ngaⁿ'a ntiinⁿnyuⁿ di yeⁿ'ē tanducuén'ē ndúúcū vaadī cuaacu.

9 Dii ní neⁿ'e di cosas chi cuaacu, ní nguée^e neⁿ'e di chεε chi nguée^e cuaacu. Cucáávā chuū Ndyuūs yeⁿ'e di chi chiida di ní tee yā dii vaadī yeenu taavi nguée^e ti ca'a yā 'iiⁿ'yāⁿ chi yeⁿ'é nī.

10 'Tiicá ntúūⁿ Ndyuūs ngaⁿ'a yā yeⁿ'ē daiyá yā Jesucristo:

Díí, Señor, ndii cuááⁿ vmnaaⁿ s'núuⁿ di cimientu yeⁿ'e iⁿ'yeeⁿdí 'cūū, ní din'dái di nanguuvi ndúúcū ta'a di.

11 Iⁿ'yeeⁿdi ndúúcū nánguovi ní dí'cuiinu naati díí 'áámá cūnee di. Ní tanducuén'ē chuū cuuvi ndiicúū tan'dúúcā catecai yú, 'tíicā ndiicúū.

- 12 Ní diíⁿ nī n'cánnduu nī nducuéⁿ'ē tan'dúú^{cā} 'iiⁿ'yāⁿ diíⁿ yā chí n'cannduu yā catecaí yā. Ní n̄ⁿ'daaⁿ di nducuéⁿ'ē tan'dúú^{cā} 'iiⁿ'yāⁿ n̄ⁿ'daaⁿ yā catecaí yā. Naati dii Jesucristo daiyá Ndyuūs 'āā daamá nūⁿ canee di nduuyu nduuyu. Ní 'áámá cūnee di cueⁿ'e daāⁿmaⁿ.
- 13 Ndyuūs nguéé caⁿ'á yā mar 'áámá ángel mar 'áámá vmnéⁿ'ēe tan'd'úú^{cā} chi ngii yā daiyá yā Jesucristo 'tíicā:
- 'Cuūndī di lado ta cuaācú ndíí 'úú diíⁿ chi nducyaacá yā chí taáⁿ yā yeⁿ'ē di canee yā maaⁿ ca'a di tan'dúú^{cā} 'áámá banco 'líí 'tíica yā chí cheé dí yeⁿ'é yā.
- 14 Nducyáácá ángeles ní espíritu s'eeⁿ chi diíⁿ yā ntiiⁿ'nyuⁿ yeⁿ'é Ndyuūs. Ní Ndyuūs dichó'o yā ángeles chí innee yā 'iiⁿ'yāⁿ na iⁿ'yeeⁿdí 'cūū chi Ndyuūs nadinguáⁿ'ai yā.

2

Canéé chí diíⁿ yú cuidado yeⁿ'e chi Ndyuūs nadanguáⁿ'ai yā s'uuúⁿ

¹ Ní cucáávā chi Cristo nadanguáⁿ'ai yā s'uuúⁿ canéé chí candεε yú cuidado yeⁿ'é nduudu cuaacu chí n'giindiveeⁿ yú ti nguéé i'neeⁿ yú cucáávā nduudu chí n̄ⁿ'daaⁿ ní maaⁿ ní nguéé caⁿ'a yú táámá yúúní.

² Nduudu cuaacu chí 'āā ngaⁿ'a ángeles ní nduudu chí ch'iⁿ'i nanááⁿ 'iiⁿ'yāⁿ chí cuaacu níⁿ'nyúⁿ chí nduudu cuaacu. Ní 'iiⁿ'yāⁿ chí nguéé n'giindiveeⁿ yā nduudu cuaacu miiⁿ ní v'éé nuuⁿndi yeⁿ'é yā 'āā cūneé yā na castigo caati 'tíicā cuuvi.

³ Ní maaⁿ ní ¿táácā cuuví nanguaⁿāi s'uuúⁿ yeⁿe castigo nduuti chi nguéeⁿ diiⁿ yú cuidado yeⁿe chi nadanguáⁿai yā s'uuúⁿ? Vmnááⁿ vmaaaⁿ Señor Jesucristo ngaⁿá yā chi nadanguáⁿai yā 'iiⁿyāⁿ. Cuayivi miiⁿ ní 'iiⁿyāⁿ chi ch'iindiveéⁿ yā nduudu miiⁿ diiⁿ yā ch'iⁿí yā s'uuúⁿ ndúúcū pruebas chi nduudu miiⁿ ní nduudu cuaacu.

⁴ 'Tiicá ntúūⁿ tiempo maaⁿ Ndyuūs ch'iⁿí yā s'uuúⁿ chi cuaacu chi nduudu miiⁿ ní cuaacu caati diiⁿ yā señas ndúúcū vaadī n'giinu chi ch'εεε. Ní ch'iⁿí yā poder yeⁿe yā ní diiⁿ yā milagros. Ní ca'a yā n'deee n'dái ntiiⁿnyuⁿ yeⁿe Espíritu N'dai yeⁿe yā 'iiⁿyāⁿ chi yeⁿe yā caati 'tíicā neⁿe yā diiⁿ yā.

Jesucristo ch'iindiyáaⁿ yā tan'dúúcā 'áámá saⁿā yeⁿe ín'yeeⁿdī

⁵ Ndyuūs nguéeⁿ cuuvi s'neéⁿ yā chi ángeles miiⁿ ngaⁿá yā ntiiⁿnyuⁿ yeⁿe ín'yeeⁿdī chi cuayivi caⁿá yā din'dái yā. Ní yeⁿe ín'yeeⁿdī miiⁿ chíiⁿ chi ngaⁿa yú.

⁶ Nguéeⁿ diiⁿ yā 'tíicā. Ná libro yeⁿe Ndyuūs chi canéeⁿ nguūⁿ ní 'áámá yā ngaⁿa yā 'tíicā: N'dii, Ndyuūs, ¿dé'ē chi saⁿā s'eeⁿ chi snéē na ín'yeeⁿdí 'cūū chi nan'gaacu nī yeⁿe sa? ¿Dé'ē chi saⁿā s'eeⁿ chi snéē na ín'yeeⁿdí 'cūū chi diiⁿ nī cuidado yeⁿe saⁿā s'eeⁿ?

⁷ Ta 'líiⁿ tiempo nūuⁿ n'dii, Ndyuūs, s'neéⁿ nī saⁿā Daiyá nī chi nguéeⁿ ch'εεε cá yā tan'dúúca ángeles. Ní teé nī saⁿā daiyá nī chi ch'εεé yā ndúúcū honra yeⁿe yā tan'dúúcā chi saⁿā rey 'tíica yā. Ní chi'neéⁿ nī saⁿa miiⁿ chi caaⁿmaⁿ ntiiⁿnyuⁿ yā yeⁿe tanducuéⁿe chi nadin'dái nī.

⁸ Ní s'neéⁿ nī tanducuéⁿe dendu'ū maaⁿ ta'á yā.

Ní 'tíica rā va ti Ndyuūs s'néⁿ yā tanducuéⁿē dendu'ū chi saⁿ'ā miiⁿ caaⁿ'máⁿ yā ntiiⁿnyuⁿ yeⁿ'ē. Maaⁿ ní nguéé inaaⁿ yú chi saⁿ'ā miiⁿ ngaⁿ'a ntiiⁿnyúⁿ yā yeⁿ'e tanducuéⁿē.

⁹ Naati maaⁿ ní snaaⁿ yú chi Ndyuūs diíⁿ yā chi Jesucristo nguéé ch'εεté yā tan'dúú^{cā} ángeles dúú'^{ví} tiempo nū^uⁿ. Ní Ndyuūs neene ya'ai 'iinú yā 'iiⁿ'yāⁿ yeⁿ'e iⁿ'yeeⁿdí 'cūū chi neⁿ'é yā chi Jesucristo ch'iⁱ yā lugar yeⁿ'e nducyaaca yú. Maaⁿ ní véé δεεvé yeⁿ'e Jesucristo ní véé honra yeⁿ'é yā cucáá^{vā} chí ch'iⁱ yā na cruz.

¹⁰ Ní Ndyuūs din'dái yā tanducuéⁿē dendu'ū ní diíⁿ yā cuidado yeⁿ'ē. Ní n'daacā diiⁿ Ndyuūs taachi diiⁿ chi Jesucristo miiⁿ ní saⁿ'ā perfecto yā chí chichéé yā yeⁿ'e nducuéⁿē chi n'geenu yā ngii. Ní Ndyuūs n'diichí yā chi n'daacā idiíⁿ yā. 'Tíicā diiⁿ Ndyuūs caati cuuvi yeⁿ'é yā n'deee n'dái daiyá yā. Ní cuuvi ca'a yā 'iiⁿ'yāⁿ s'eeⁿ parte chi cuuvi yeⁿ'é yā ndúú^{cū} vaadī δεεεε n'dai yeⁿ'é yā. Jesucristo ní saⁿ'ā chi nadanguáⁿ'ai yā 'iiⁿ'yāⁿ yeⁿ'e iⁿ'yeeⁿdí 'cūū.

¹¹ Ní Jesucristo ní didεεvé yā 'iiⁿ'yāⁿ yeⁿ'e nuuⁿndi yeⁿ'é yā ní 'iiⁿ'yāⁿ chí ndúú^{ví} δεεvé yā ní tan'dúú^{cā} Jesucristo miiⁿ. Véé 'áámá nū^uⁿ chiida nducyaaca 'iiⁿ'yā. Cáá^{vā} chuū Jesucristo nguéé 'cuinaáⁿ yā chí caaⁿ'máⁿ yā chí 'iiⁿ'yāⁿ s'eeⁿ ní víⁱ yā.

¹² Ní 'tíicā Jesucristo ngaⁿ'á yā ngii yā 'iiⁿ'yāⁿ s'eeⁿ ní canéé nguūⁿ:

N'dií Ndyuūs, 'úú caaⁿ'máⁿ yeⁿ'é n'dií nanááⁿ hermanos yeⁿ'é ní caátá himnos chí cantos chí ngaⁿ'ā chí ch'εεté nī nanááⁿ 'iiⁿ'yāⁿ yeⁿ'é nī taachi nduuvidaamá yā.

13 Taama vmnéⁿēe Jesucristo caⁿ'a yā 'tiicā:

'Úú ní canéé confianza yeⁿ'é ndúúcū Ndyuūs.
Ní táámá caⁿ'a yā:

'Muuⁿ caneé ndúúcū daiyá chi Ndyuūs tee yā 'úú.

14 'Tíicā, 'iiⁿ'yāⁿ yeⁿ'e 'áámá familia ní 'áámá yuūtē yeⁿ'é yā ní 'áámá yuūuⁿ ntúūⁿ va. Ní 'tiicā ntúūⁿ Jesucristo miiⁿ ch'iindiyáaⁿ yā ndúúcū cuerpo ndúúcū yuūúⁿ tan'dúúcā s'uuúⁿ. Ní 'tiicā ntúūⁿ Jesucristo ch'iī yā caati cuuvi di'cuiinú yā yááⁿ'nguiinūuⁿ caavā chi diiⁿ sa chi nducyaaca yú ní n'gii yú.

15 'Tiicā ntúūⁿ Jesucristo diíⁿ yā chi nguéé 'va'a yú yeⁿ'e tiempo chí 'cuūvi yú.

16 Cuaacu chi Jesucristo nguéé ndaá yā nanááⁿ ángeles chi chinnee yā ángeles naati nanááⁿ 'iiⁿ'yāⁿ yeⁿ'e ndaata yeⁿ'e Abraham cáávā chi nadanguáⁿ'ai yā 'iiⁿ'yāⁿ.

17 Cáávā chuū Jesucristo canéé chi ch'iindiyáaⁿ yā tan'dúúcā nducyaaca hermanos yeⁿ'é yā ní 'íicú maáⁿ yā cuuvi cūneé yā chiiduú ch'εεε ca chi 'áámá cānee yeⁿ'e ntiiⁿ'nyuⁿ yeⁿ'e Ndyuūs. Ní ya'ai 'iinú yā 'iiⁿ'yāⁿ. Ní 'íicú cuuvi nadach'εēcú yā nuuⁿndi yeⁿ'e 'iiⁿ'yāⁿ ti nadíⁿ'vε yā nducuéⁿ'ē nuuⁿndi yeⁿ'e 'iiⁿ'yāⁿ.

18 Ní Jesucristo maáⁿ yā ch'eenú yā chii ní chichεε yā taachi ndaá yááⁿ'nguiinūuⁿ chí n'diichineeⁿ sa 'yā. Ní cáávā chuū maaⁿ ní Jesucristo cuuvi cūnnee yā 'iiⁿ'yāⁿ s'eeⁿ taachi n'geenú yā ngii ní nadanguáⁿ'ai yā 'iiⁿ'yāⁿ s'eeⁿ yeⁿ'e yááⁿ'nguiinūuⁿ taachi ndaa sa n'diichineeⁿ sa 'iiⁿ'yāⁿ s'eeⁿ.

3

Jesucristo ní ch'εεε taavi cá yā nguée ti Moisés

¹ Ndís'tiī, hermanos ye^{n'}e yú chi Cristo didεενέ yā ní ndís'tiī ntúūⁿ Ndyuūs yaa'ví yā ndís'tiī chi cuuvi ye^{n'}é yā. Maaⁿ ní nadicádíínuuⁿ n'dai nī ye^{n'}e Jesucristo chi apóstol chi dichó'o Ndyuūs ti Jesucristo miiⁿ ní chiiduú ch'εεε cá ye^{n'}é 'iiⁿyāⁿ chi i'téenu yā Jesucristo tan'dúúcā s'uuúⁿ.

² Jesucristo miiⁿ 'áámá caneé yā ndúúcū Ndyuūs ní diíⁿ yā tanducué^{n'}e dendu'ū. Ní diíⁿ yā tanducué^{n'}e dendu'ū chi Ndyuūs dine^{n'}é yā. Ní tan'dúúcā Moisés din'daacá yā ntiiⁿnyuⁿ chi Ndyuūs ca'a yā, 'tíicā ntúūⁿ Jesucristo din'daacá yā tanducué^{n'}e ntiiⁿnyuⁿ ye^{n'}e va'ai ye^{n'}é Ndyuūs chi Ndyuūs ca'a yā.

³ Ní 'áámá 'iiⁿyāⁿ chi din'dái yā 'aama va'āi ní ch'εεε cá yā nguée ti va'āi miiⁿ. 'Tíicā Jesucristo ní ch'εεε taavi cá yā nguée ti Moisés.

⁴ Deenu yú chi véé 'iiⁿyāⁿ chi din'dái yā ca'áámá cā'aama va'āi naati Ndyuūs din'dái yā nducué^{n'}e dendu'ū chi véé.

⁵ Moisés miiⁿ dichíí'vé yā Ndyuūs ní n'dááca taavi idiiⁿ sa ntiiⁿnyuⁿ ye^{n'}e vaacu Ndyuūs. Ní Moisés diíⁿ yā ntiiⁿnyuⁿ chi nga^{n'}a yā nduudu ye^{n'}é Ndyuūs chi Ndyuūs ca^{n'}a yā chi caa^{n'}máⁿ yā cuayi-ivi.

⁶ Naati Cristo chi daiyá Dendyuūs ní 'áámá diiⁿ yā ntiiⁿnyuⁿ ti 'iiⁿyāⁿ ndii tííⁿ yā ye^{n'}e vaacu Dendyuūs. Ní s'uuúⁿ tan'dúúcā vaacu Ndyuūs 'tíicā s'uuúⁿ nduuti chi caneé diitu yú ndúúcū chi i'teenu yú. Ní yeenu yú ndúúcū chi cuuvi ye^{n'}e yú ndíí tiempo chi 'cuūvi yú.

Véé tiempo chi ntaavi'tuunúūⁿ 'iiⁿ'yāⁿ chi yeⁿ'é Ndyuūs

⁷ Ní chuū Espíritu N'dai yeⁿ'é Ndyuūs ngaⁿ'a yā 'túúcā naachi canéé nguūⁿ na libro yeⁿ'é Ndyuūs:

Maaⁿnguuví miiⁿ nduuti chi ndís'tiī 'caandiveéⁿ nī nduudu yeⁿ'é Ndyuūs:

⁸ Nguéé dichεεchí nī staava yeⁿ'é nī chí ditaán nī tan'dúúcā chi diíⁿ 'iiⁿ'yāⁿ tiempo chi 'āā chó'ōo taachi 'iiⁿ'yāⁿ s'eeⁿ diíⁿ yā n'diichineéⁿ yā Ndyuūs ndúúcū nuuⁿndi chí diíⁿ yā na yáⁿ'āa cuuⁿmáⁿ naachi nguéé ch'εεtinéé 'iiⁿ'yāⁿ.

⁹ Ní Ndyuūs ngaⁿ'á yā ngī yā 'iiⁿ'yāⁿ:

Tiempo chí chó'ōo na yáⁿ'āa cuuⁿmáⁿ naachi nguéé ch'εεtinéé 'iiⁿ'yāⁿ, 'iiⁿ'yāⁿ s'eeⁿ yeⁿ'é ndaata yeⁿ'é nī n'diichineéⁿ ntúuⁿ yā 'úú 'áará chí n'diichí yā nducuéⁿ'é chí 'úú diíⁿ ndúúcū yā 'naaⁿ chí 'uūvī ngεεcu nduuyū.

¹⁰ Ní cáávā chuū 'úú, Ndyuūs, ditaán ndúúcū 'iiⁿ'yāⁿ s'eeⁿ. Ní 'túúcā ngaⁿ'á ngī 'iiⁿ'yāⁿ s'eeⁿ: Ndis'tiī, nducuéⁿ'é tiempo nguéé n'daacā nadacadíínuuⁿ nī na staava yeⁿ'é nī. Ní nguéé n'diichí nī yúúní yeⁿ'é.

¹¹ Ní cáávā chí diíⁿ 'iiⁿ'yāⁿ s'eeⁿ 'úú ní nguéé canee yiínú yeⁿ'e yā ní caⁿ'a 'túúcā: Cuáácú chí 'iiⁿ'yāⁿ s'eeⁿ nguéé cuuví ndaa yā naachi canéé chí ntaavi'tuunúūⁿ 'iiⁿ'yāⁿ yeⁿ'e ndaata yeⁿ'é nī.

¹² Maaⁿ ní ndís'tiī, hermanos yeⁿ'é, cundéε nī cuidado chí nguéé 'áámá ndís'tiī chí nguéé n'daacā staava yeⁿ'é nī chí nguéé i'téenu nī ní nguéé divíi nī yeⁿ'é Ndyuūs chí canduuchi.

13 Ní ndís'tiī ní yaa'ví nī ví'i nī 'áámá nī taama nī nguuvi nguuvi taachi maaⁿnguuvi ní 'íicú mar 'áámá ndís'tiī nguéé dichεechí nī staava yeⁿ'é nī cáávā nuuⁿndi chi nginnche'eī ndís'tiī.

14 Ní véeé 'áámá cuaaⁿ yeⁿ'ē yú ndúúcū Cristo nduuti chi s'uuúⁿ ní 'áámá canee yú ndúúcū chi i'téenu yú vmnááⁿ vmaaⁿ yeⁿ'e Cristo ndíi tiempo chi 'cuūvi yú.

15 'Tíicā canéé guuⁿ na libro yeⁿ'é Ndyuūs: Nguéé dichεechí nī staava yeⁿ'é nī chi ditaáⁿ nī tan'dúúcā chi diiⁿ 'iiⁿ'yāⁿ na yáⁿ'āa cuūⁿmáⁿ naachi nguéé ch'εetinéé 'iiⁿ'yāⁿ tiempo chi chó'ōo taachi n'diichineeⁿ yā 'úú chi Ndyuūs.

16 ¿Du'ú 'iiⁿ'yāⁿ chi ch'iindiveéⁿ yā nduudu yeⁿ'é Ndyuūs ní cuayiivi nduuvitaáⁿ yā? 'Túúcā diiⁿ nducyaaca 'iiⁿ'yāⁿ chi cueⁿ'é yā ndúúcū Moisés yeⁿ'e yáⁿ'āa Egipto. Nducyaacá yā nduuvitaáⁿ yā.

17 ¿Du'ú 'iiⁿ'yāⁿ chi Ndyuūs nguéé yiinú yā nduucú yā 'uūvī ngeεecu nduuyu? 'Túúcā nguεε yiinú yā ndúúcū 'iiⁿ'yāⁿ chi dinuuⁿndí yā ní ch'iī yā na yáⁿ'āa cuūⁿmáⁿ naachi nguéé ch'εetinéé 'iiⁿ'yāⁿ.

18 ¿Du'ú 'iiⁿ'yāⁿ chi Ndyuūs ngaⁿ'á yā caavā maaⁿ chi duuchí yā chi 'iiⁿ'yāⁿ s'eeⁿ nguéé cuuví cundaa yā lugar naachi ntaavi'tuunúⁿ 'iiⁿ'yāⁿ yeⁿ'e yā? 'Túúcā ngaⁿ'á yā yeⁿ'e 'iiⁿ'yāⁿ chi nguéé n'giindiveéⁿ yā nduudu yeⁿ'e yā.

19 Maaⁿ ní deenu yú ti 'iiⁿ'yāⁿ s'eeⁿ nguéé cuuvi cundaa yā lugar yeⁿ'e Ndyuūs ti nguéé i'téenu yā Ndyuūs.

4

1 Maaⁿ ní Ndyuūs tee yā promesa s'uuúⁿ

chi cuuvi cundaa yú lugar ye^{n'}é yā ní cuuvi ntaavi'tuunúūⁿ yú ndúúcu Ndyuūs. Canéé chí candεε yú cuidado caati 'aatī 'aama chéé ndis'tiī nguéé cuchéé nī tanducué^{n'}ē dendu'ū ní nguéé cuuvi cundaa nī lugar miiⁿ.

² Caati 'ii^{n'}yāⁿ ye^{n'}é Jesucristo ndεé yā nduudu cuaacu ye^{n'}é Jesucristo nanááⁿ s'uuúⁿ, 'tiicá ntúūⁿ nanááⁿ 'ii^{n'}yāⁿ s'eeⁿ chi ch'tiī yā na yá^{n'}āa cuu^{m'}ánⁿ naachi nguéé ch'εεtinéé 'ii^{n'}yāⁿ. Ní nguéé dichíí'vē nduudu cuaacu ye^{n'}é Ndyuūs nguaaⁿ 'ii^{n'}yāⁿ s'eeⁿ ti taachi ch'iindiveéⁿ yā nduudu miiⁿ nguéé s'téenu yā ye^{n'}ē.

³ Naati s'uuúⁿ chi i'teenu yú nduudu miiⁿ, s'uuúⁿ ní cuuvi ndaa yú naachi ca^{n'}a Ndyuūs chi ntaavi'tuunúūⁿ yú ndúúcu yā. 'Tíicā nga^{n'}a Ndyuūs na libro ye^{n'}é yā naachi canéé nguūⁿ:

Cáávā chi díⁿ 'ii^{n'}yāⁿ s'eeⁿ 'úú nguéé yiinú ye^{n'}e yā. Ní cuaacú nga^{n'}á nduudu ndúúcu maááⁿ chi duuchí. Nguéé cuuvi ndaa yā nduucú na lugar ye^{n'}é naachi ntaavi'tuunúūⁿ.

Ní Ndyuūs di'cuiinú yā ntiiⁿnyuⁿ ye^{n'}é yā taachi din'dái yā i^{n'}yeeⁿdí 'cūū.

⁴ Ní 'áámá cuaaⁿ ye^{n'}ē libro ye^{n'}é Ndyuūs naachi canéé nguūⁿ ní nga^{n'}a ye^{n'}ē ndíí chí ndεεchē ngu- uvi chi ntaavi'tuunúūⁿ 'ii^{n'}yāⁿ:

Ndyuūs ní ndíí chí ndεεchē nguuvi ntaavi'tuunúūⁿ yā ye^{n'}ē tanducué^{n'}ē ntiiⁿnyuⁿ ye^{n'}é yā.

⁵ Ní canee táámá vmne^{n'}ēe na libro ye^{n'}e Ndyuūs 'tíicā:

'Ii^{n'}yāⁿ s'eeⁿ nguéé cuuvi cūndaa yā ní ntaavi'tuunúūⁿ yā nduucú.

⁶ Maaⁿ ní véé n'duuvi 'ii^{n'}yāⁿ chi canéé chí cundaa yā na lugar naachi ntaavi'tuunúūⁿ 'ii^{n'}yāⁿ. Naati

'iiⁿyāⁿ chi vmnááⁿ vmnaaⁿ n'giindiveéⁿ yā nduudu cuaacu miiⁿ nguéeⁿ sndaa yā ti nguéeⁿ s'téenu yā Ndyuūs.

7 Taama vmnéⁿ'ēe Ndyuūs s'neéⁿ yā 'áámá nguuvi ní ngaⁿ'a yā chi nguuvi ní maaⁿnguuvi. Ní Ndyuūs ngaⁿ'a yā yeⁿ'ē nduudu miiⁿ cuayiivi taachí 'āā chó'ōo chuū. 'Āā 'naaⁿ tiempo nguuvi chi David ngaⁿ'a sa yeⁿ'ē. Ní 'tíicā canée nguūⁿ na libro yeⁿ'é Ndyuūs yeⁿ'ē nguuvi miiⁿ:

Maaⁿnguuvi nduuti chi ndís'tiī 'caandiveéⁿ nī nduudu chi Ndyuūs ngaⁿ'á yā: Nguéeⁿ dichεεchí nī staava yeⁿ'é nī.

8 Ní nduuti chi saⁿ'ā Josué chi saⁿ'ā ndíi tiīⁿ yeⁿ'e 'iiⁿyāⁿ Israel s'eeⁿ cuuvi sa ca'a sa 'iiⁿyāⁿ Israel s'eeⁿ chí ntaavi'tuunúuⁿ yā tuu'mi ní Ndyuūs nguéeⁿ canee chi caaⁿ'máⁿ yā taama vmnéⁿ'ēe yeⁿ'ē táámá nguuvi.

9 Maaⁿ ní cáávā chuū véeⁿ chi ntaavi'tuunúuⁿ 'iiⁿyāⁿ chi yeⁿ'é Ndyuūs.

10 Ní 'iiⁿyāⁿ chi sndaa yā naachi Ndyuūs ntaavi'tuunúuⁿ yā 'āā ntéeⁿ idiíⁿ yā ntiiⁿnyuⁿ tan'dúúcā chi Ndyuūs 'āā ntéeⁿ idiíⁿ yā ntiiⁿnyuⁿ.

11 Maaⁿ ní canée chí di'cuíitu yú chi cuuvi cūndaā yú lugar naachi ntaavi'tuunúuⁿ yú ní 'aatī tanáⁿ'ā yú diiⁿ yú chi nguéeⁿ i'téenu yú tan'dúúcā 'iiⁿyāⁿ s'eeⁿ chi nguéeⁿ chí'téenu yā.

12 Ní nduudu cuaacu yeⁿ'é Ndyuūs ní canduuchi ní neené ditiīnú. Ní vεε ca 'caāiⁿ yeⁿ'ē nguéeⁿ ti 'áámá machete chi 'caāiⁿ nduu 'uuvī lados. 'Tíicā nduudu cuaacu yeⁿ'é Ndyuūs. Ndaā na coo yeⁿ'e cuerpo yeⁿ'e yú naachi canee alma yeⁿ'e yú ndúúcū espíritu yeⁿ'e yú ndíi túútē yeⁿ'e yú. Ní

déenu chεε chi tumicadínnuuⁿ yú ndúúcū chεε chi neⁿe yú diiⁿ yú chi ngiicā yeⁿe staava yeⁿe yú.

¹³ Nguéé dε'ē vεε chi véé chi cuuvi cunúúⁿ n'de'ei yeⁿé Ndyuūs. Ndyuūs din'dái yā tanducuéⁿē dendu'ū chi véé ní inaáⁿ yā nducuéⁿē tan'dúúcā chi canee nanáaⁿ yā. Ní canéé chí ca'a yú cuenta yeⁿe vida yeⁿe yú taachi ndaa yú nanáaⁿ yā.

Jesús ni chiiduú ch'εεε taavi ca yeⁿe yú

¹⁴ Jesús chi daiyá Dendyuūs ní chiiduú ch'εεε taavi ca yeⁿe yú. Ní cunaⁿa yā va'ai chεεti nguuvi ní ndaá yā nanáaⁿ Ndyuūs. Ní cáávā chuū canee chi 'áámá canee yú ndúúcū chi i'teenu yú Ndyuūs.

¹⁵ Ní chiiduú ch'εεε taavi ca yeⁿe yú ya'ai 'iinú yā s'uuúⁿ taachi n'geenu yú ngii caati Jesús miiⁿ ní ch'eenú yā chii tanducuéⁿē tan'dúúcā s'uuúⁿ naati nguéé dinuuⁿndí yā mar 'áámá vmnéⁿēe.

¹⁶ Ní cáávā chuū cuuvi ndaa yú nanáaⁿ trono yeⁿé Ndyuūs yeⁿe yú ndúúcū confianza ti dineⁿé yā s'uuúⁿ. Ní 'íicú Ndyuūs cuuvi ya'ai 'iinú yā yeⁿe s'uuúⁿ ní cunnee yā s'uuúⁿ taachi, véé necesidades yeⁿe yú. Ní itée yā s'uuúⁿ denduⁿū chi n'daacā n'dai yeⁿé yā.

5

¹ Tiempo chi chó'ōo 'iiⁿyāⁿ chi snée yā iⁿ'yeeⁿdí 'cūū ndεεvé yā ca'áámá cā'aama chiiduú ch'εεε chi canéé chi díiⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúⁿ yā 'iiti chí candεε 'iiⁿyāⁿ s'eeⁿ ti ofrenda caavā nuuⁿndi yeⁿé yā.

² Ní chiiduú ch'εεε ca ní dinuuⁿndí yā tan'dúúcā nducyáácá 'iiⁿyāⁿ. Ní cáávā chuū véé paciencia

yeⁿ'é yā ndúú^{cū} 'iiⁿ'yāⁿ chi tonto ní ndúú^{cū} 'iiⁿ'yāⁿ chi dinuuⁿndi yā.

³ Ní chiiduú ch'εεε ca cáávā chi dinuuⁿndi yā canéé chí 'caaⁿ'núⁿ yā 'iiti chi ofrenda yeⁿ'e maáⁿ yā cáávā nuuⁿndi yeⁿ'e maáⁿ yā tan'dúú^{cā} chi diiⁿ tanáⁿ'ā 'iiⁿ'yāⁿ cáávā nuuⁿndi yeⁿ'é yā.

⁴ Ní mar 'áámá saⁿ'ā cuuvi diiⁿ sa nombrar maaⁿ sa lado yeⁿ'ē chiiduú ch'εεε ca cáávā chi maāⁿ sa neⁿ'e sa ti Ndyuūs yaa'ví yā saⁿ'ā chi cuuvi chiiduú ch'εεε ca chi diiⁿ sa ntiⁿnyuⁿ yeⁿ'é yā tan'dúú^{cā} chi yaa'ví yā saⁿ'ā Aarón chi cuuvi chiiduú ch'εεε ca tiempo chi 'āā chó'ōo.

⁵ 'Tiicá ntúūⁿ chó'ōo yeⁿ'e Cristo. Cristo miinⁿ nguéé diiⁿ yā nombrar maáⁿ yā chi cuuvi chiiduú ch'εεε ca. Ndyuūs yaa'ví yā Cristo chi cuuvi chiiduú ch'εεε ca. Ní 'tíicā canéé nguūⁿ na libro yeⁿ'é Ndyuūs:

Dii ní daiyá, 'úú ní chiida di ní cuaacu chí dii ní daiyá.

⁶ Ngaⁿ'a ntúūⁿ táámá ni canéé nguūⁿ na libro yeⁿ'é Ndyuūs 'tíicā:

Díi ní daiyá ní cuéⁿ'é daāⁿmaⁿ canee di chiiduú ch'εεε ca. Tan'dúú^{cā} chi tiempo chi 'āā chó'ōo chiiduú ch'εεε ca chi nguuvi Melquisedec 'tiicá nī ti yeⁿ'ē ndaata yeⁿ'é yā.

⁷ Ní taachi Jesús canee yā iⁿ'yeeⁿdí 'cūū caⁿ'angua'á yā nanáⁿ Ndyuūs chiidá yā ní ngaⁿ'a yā: N'dií Ndyuūs diiⁿ nī chiiⁿ chi neⁿ'é nī. Ní 'caī diitú yā neⁿ'e chi chεēcú yā: N'diī, Ndyuūs, cuuvi nadanguáⁿ'ai nī 'úú chí nguéé 'cuūví nduuti chi neⁿ'é nī diiⁿ nī 'tíicā. Ní Ndyuūs ch'iindiveéⁿ yā nduudu yeⁿ'e Jesús taachi ngaⁿ'angua'á yā ti dich'εεté yā Ndyuūs. Ní Ndyuūs ca'á yā fuerzas Jesús.

8 Ní 'áará chí Jesús miiⁿ ní daiyá Dendyuūs ch'een yā cáávā dendú'ū chi canéé chí ch'eenú yā chiī ní ch'iindiveéⁿ yā yeⁿ'e nducuéⁿ'ē.

9 Ní taachi Ndyuūs n'diichineéⁿ yā Jesús, Jesús miiⁿ ní diíⁿ yā nducuéⁿ'ē chi neⁿ'e Ndyuūs. Ní 'íicú Jesús miiⁿ cuuví yā nadanguáⁿ'ai yā nducyaaca s'uuúⁿ chi n'giindiveeⁿ yú yeⁿ'e yā.

10 Ní Ndyuūs diíⁿ yā chí Jesús cuuvi chiiduú ch'εεε ca tan'dúúcā tiempo chí chó'ōo chiiduú ch'εεε ca chí nguuvi Melquisedec, 'tiicá yā.

Véé peligro yeⁿ'e yú chí ngaⁿ'a yú chí 'āā ntéé i'teenu yú Jesucristo

11 Maaⁿ ní véé cá chí neⁿ'é 'nū caaⁿ'máⁿ 'nū yeⁿ'e Melquisedec chí chiiduú ch'εεε ca naati ngii n'dái caaⁿ'máⁿ 'nū yeⁿ'ē ti ndís'tiī ní nguéé ituumicadi-inuuⁿ nī.

12 'Āā chó'ōo tiempo chí ndís'tiī 'āā s'téénu nī ní maaⁿ ní ndís'tiī canéé chí ca'cueéⁿ nī 'iiⁿ'yāⁿ naati ndíí maaⁿ 'āā neⁿ'é nī taama vmnéⁿ'ēe chí 'áámá 'iiⁿ'yāⁿ ca'cueéⁿ yā ndís'tiī dendu'ū chí vmnááⁿ vmnaaⁿ yeⁿ'é Ndyuūs. Ní ndís'tiī ní 'āā débil nī. Ní tan'dúúcā dacuá'āa chí neⁿ'e leche ní nguéé neⁿ'e comida chí ditiīnú, 'tiicá nī.

13 Ní 'iiⁿ'yāⁿ chí dámaāⁿ ngi'i leche ní tan'dúúcā dacuá'āa 'tiicá yā. Ní nguéé deenú yā de'ē chí n'daacā o de'ē chí nguéé n'daacā.

14 Ní comida chí ditiīnu ní che'é 'iiⁿ'yāⁿ n'geēté chí 'āā deenú yā in'nuú yā chéé chí n'daacā o chéé chí nguéé n'daacā caati 'tíicā costumbre yeⁿ'é yā chí diíⁿ yā.

6

¹ Maaⁿ ní i'téenu ca yú ní 'caandiveeⁿ ca yú cosas chi chεεchi chi 'iiⁿ'yāⁿ ca'cueéⁿ yā s'uuúⁿ. Ní nguéeⁿ neⁿ'e yú 'caandiveeⁿ yú taama vmnéⁿ'ēe tan'dúúcā chi ngi'cueéⁿ yā s'uuúⁿ ndii vmnááⁿ vmnaaⁿ taachi cáámá i'teenu yú nduudu cuaacu yeⁿ'é Cristo. Ní nguéeⁿ ngaⁿ'a yú táámá vmnéⁿ'ēe chi s'neeⁿ yú ntiinyuⁿ yeⁿ'e yú chi nguéeⁿ n'daacā chí diiⁿ chi 'cuūvi yú ti maaⁿ ní i'teenu yú Jesucristo.

² Ní nguéeⁿ ca'cueeⁿ ca yú yeⁿ'ē chi ngεεdínuūⁿní, ní nguéeⁿ yeⁿ'ē chi s'nuuⁿ yú ta'a yú nanááⁿ tíiⁿ 'iiⁿ'yāⁿ, ní nguéeⁿ yeⁿ'ē chi nduuchí 'iiⁿ'yāⁿ chi yeⁿ'e Cristo yeⁿ'ē nguaaⁿ tináⁿ'ā, ní nguéeⁿ yeⁿ'ē nguuvi chí Cristo díiⁿ yā juzgar nducyaaca 'iiⁿ'yāⁿ.

³ Ca'cueeⁿ ca yú más cā yeⁿ'e chi i'téenu yú yeⁿ'e Cristo. Ní chuū ní diiⁿ yú nduuti chí Ndyuūs neⁿ'e yā.

⁴ Ní ζδε'ē yeⁿ'e 'iiⁿ'yāⁿ chí 'āā sta'á yā δεεεε chí Cristo, ní sta'á yā cosas chí n'dai taavi chí Cristo ca'a yā, ní 'āā sta'á yā Espíritu N'dai yeⁿ'e Cristo,

⁵ ní deēnú yā nduudu cuaacu chí n'dai chí yeⁿ'é Ndyuūs ndúúcū poder chí yeⁿ'e táámá iⁿ'yeeⁿdi chí cuchíi?

⁶ Ní nduuti chí 'iiⁿ'yāⁿ s'eeⁿ ndaacadaamí yā yeⁿ'e Cristo ní dinuuⁿndí yā, nguéeⁿ cuuvi díiⁿ yā ndaa yā nanááⁿ Cristo chí nadach'εεcú yā nuuⁿndi yeⁿ'é yā, tí 'iiⁿ'yāⁿ s'eeⁿ díiⁿ yā tan'dúúcā chí s'nééⁿnga'á yā daiyá Ndyuūs miiⁿ taama vmnéⁿ'ēe. Ní díiⁿ yā chí Cristo miiⁿ 'cuináaⁿ yā nguaaⁿ 'yááⁿ n'dái 'iiⁿ'yāⁿ.

⁷ Ndyuūs díiⁿ yā ndúúcū 'iiⁿ'yāⁿ s'eeⁿ tan'dúúcā chí díiⁿ yā ndúúcū yáⁿ'āa taachi n'dee cuuví ngeeⁿ cuūvi vmnááⁿ yáⁿ'āa ní yáⁿ'āa sta'ā nuūⁿnīⁿ miiⁿ 'áámá 'áámá vmnéⁿ'ēe chí ngeeⁿ cúúvī. Ndyuūs ca'á

yā yá'n'āa miiⁿ cosecha chi n'dai 'iiⁿ'yāⁿ chí ngiīnú yā ndaataá.

⁸ Naati nduuti chi yá'n'āa miiⁿ ní ngii yááⁿ yeⁿ'ē ndúú^{cū} yaata chi ngu^{éé} dichíí'^{vē} tuu'mi ní ngu^{éé} dichíí'^{vē}. Ní Ndyuūs ngu^{éé} ca'á yā cosecha n'dai yeⁿ'ē ní^{cú} cuayiivi 'iiⁿ'yāⁿ ní 'neeⁿ yá'n'a yā yá'n'āa miiⁿ.

Véé chi cuuvi yeⁿ'e yú chi nnee s'uuúⁿ chi 'áámá cunee yú

⁹ Maaⁿ ní 'áará chi ngaⁿ'á 'nū 'tíicā yeⁿ'e ndís'tiī, hermanos, deenu 'nū chi véé cosas chi n'dai taavi ca yeⁿ'é nī ti yeⁿ'é Cristo ndís'tiī ní Ndyuūs nadanguáⁿ'ai yā ndís'tiī.

¹⁰ Ndyuūs dámaāⁿ diíⁿ yā dendu'ū chí cuaacu. Nn'gaacú yā yeⁿ'ē ntiiⁿnyuⁿ chi diíⁿ nī ní táácā nnee nī hermanos yeⁿ'ē yú caati dineⁿ'é nī hermanos chi i'téenu yā Jesucristo. Ní 'tíicā ní diíⁿ nī nguuvi nguuvi.

¹¹ Maaⁿ ní neⁿ'é 'nū chi ca'áámá ca'áámá ndís'tiī daamá nūⁿ idiíⁿ ní ndúú^{cū} núúⁿmáⁿ staava yeⁿ'é nī tan'dúú^{cā} chi diíⁿ nī taachi cáámá i'téenu nī. Ní diíⁿ nī ndíí tiempo chi ch'iī nī. Ní 'tíicā cuuvi cuaacu chi véé chi cuuvi yeⁿ'é nī.

¹² Ngu^{éé} neⁿ'é 'nū chi nduuví 'daan'di nī naati neⁿ'é 'nū chi din'daacá nī tan'dúú^{cā} taná'n'a cā 'iiⁿ'yāⁿ chi i'téenu yā. Ní cunee ngiīnú yā yeⁿ'e vaadī n'dai chí Ndyuūs ca'á yā 'iiⁿ'yāⁿ s'eeⁿ chi Ndyuūs ngaⁿ'á yā chi cuuvi yeⁿ'é yā 'iiⁿ'yāⁿ s'eeⁿ.

¹³ 'Āā 'nááⁿ tiempo chi chó'oō Ndyuūs diíⁿ yā 'áámá compromiso ndúú^{cū} Abraham ní Ndyuūs ngaⁿ'á yā cáávā chi duuchi maáⁿ yā chi 'tíicā caⁿ'á yā diíⁿ yā caati ngu^{éé} cá táámá 'iiⁿ'yāⁿ chi ch'εεε cá yā ti Ndyuūs.

14 Ní caⁿ'a yā: Díi, Abraham, cuaacu níⁿnyúⁿ di'viicú dii ní diíⁿ chi cuuvi n'deeē n'dái daiyá 'iiⁿ'yāⁿ yeⁿ'ē di cuaaⁿ naachi cuchī.

15 Abraham cūnee ngiinú yā compromiso yeⁿ'é Ndyuūs ndúúcū vaadī ngiīnū ní tunée yā compromiso chi Ndyuūs caⁿ'a yā chi ca'á yā Abraham miiⁿ.

16 Maaⁿ ní taachi 'iiⁿ'yāⁿ yeⁿ'e iⁿ'yeeⁿdí 'cūū ngaⁿ'á yā chi cuaacu níⁿnyúⁿ caⁿ'á yā diiⁿ yā, ngaⁿ'á yā “Por Dios” cucáávā 'áámá yā chi ch'εετε cá yā nguée ti 'iiⁿ'yāⁿ s'eeⁿ. Níicú taachi 'iiⁿ'yāⁿ s'eeⁿ ngaⁿ'á yā chi 'tíicā caⁿ'á yā diiⁿ yā cáávā 'iiⁿ'yāⁿ miiⁿ chí ch'εετε ca tuu'mi ní nguée véé más cā chi cuuvi caaⁿ'máⁿ yā yeⁿ'ē.

17 Ní 'tíicā Ndyuūs neⁿ'é yā ch'iⁿ'í yā 'iiⁿ'yāⁿ s'eeⁿ yeⁿ'e Abraham chi cuaacu níⁿnyúⁿ diiⁿ yā cumplir compromiso yeⁿ'é yā. Ní nguée ñ'daaⁿ mar 'áámá nduudu yeⁿ'é yā. Ní cáávā chuū ngaⁿ'á yā cucáávā chi duuchi maáⁿ yā.

18 Ní cáávā chuū véé 'úúví dendu'ū chi nguée cuuvi ñ'daaⁿ. Ndyuūs ní nguée cuuvi cu'neéⁿ yā táámá cosa lugar yeⁿ'ē 'uuvī compromiso yeⁿ'é Ndyuūs ndúúcū chi ngaⁿ'á yā chi caⁿ'á yā diiⁿ yā cáávā chi duuchi maáⁿ yā. Ndyuūs nguée cuuvi caaⁿ'máⁿ yā nduudu yaadi. Ní ndúúcū compromiso yeⁿ'é yā, Ndyuūs tee yā s'uuúⁿ 'viich'εεtíinūⁿ ch'εετε yeⁿ'e yú caati s'uuúⁿ n'nuuⁿ yú Ndyuūs ní i'téenu yú 'yā ní yeⁿ'ē chi Ndyuūs téē yā chi cuuvi yeⁿ'ē yú.

19 Chíⁿ chí i'téenu yú cáávā alma yeⁿ'e yú ní tan'dúúcā 'áámá ancla yeⁿ'e barco ti i'nēēⁿ diiⁿ barco chi 'āā ntéé ínuⁿ'u. 'Tíicā s'uuúⁿ ndúúcū chí i'téenu yú cuuvi ndáá niiⁿnuⁿ yú nanááⁿ Ndyuūs.

20 Jesucristo 'āā ndaá yā nanááⁿ Ndyuūs vmnááⁿ

vmnaaⁿ ye^{n'}ē s'uuúⁿ. Ní maaⁿ ní cááva yā cuuvi ndaa yú nanááⁿ Ndyuūs. Ní maaⁿ ní Jesucristo miiⁿ ní chiiduú ch'εεε ca ye^{n'}e yú chi 'áámá cūnee ná ntiiⁿnyuⁿ miiⁿ. Ní tan'dúúcā chiiduú ch'εεε ca Melquisedec chi 'áámá cūnee na ntiiⁿnyuⁿ 'āā tiicá nūuⁿ Jesucristo.

7

Ye^{n'}e Jesús chi chiiduú ch'εεε ca tan'dúúcā Melquisedec chi chiiduú ch'εεε ca

¹ 'Iiⁿyāⁿ Melquisedec ni rey ye^{n'}é yāāⁿ Salem ní chiiduú ch'εεε ca ye^{n'}e Ndyuūs chí ch'εεε n'dai. Tiempo chi 'āā 'nááⁿ chó'ōo, sa^{n'}ā Abraham ní taachi cuchí sa chi che^{n'}e sa ná caandaá naachi ch'iⁿ'nuⁿ sa reyes, sa^{n'}ā Abraham miiⁿ ndaaca sa nanááⁿ chiiduú ch'εεε ca Melquisedec ní Melquisedec di'viicú yā Abraham.

² Ní Abraham miiⁿ ní ca'ā sa Melquisedec 'áámá ndiichí parte ye^{n'}ē nducué^{n'}ē chi divíi yā ye^{n'}e 'iiⁿyāⁿ ye^{n'}e reyes cucáávā caāndāa. Ní chi duuchi chi Melquisedec vmnááⁿ vmnaaⁿ ne^{n'}ē caa^{n'}mán rey chi ye^{n'}e vaadī cuaacu. Ní cuayiivi ní ne^{n'}e caa^{n'}mán rey ye^{n'}e yāāⁿ Salem, ní chi duuchí yā ne^{n'}e caā^{n'}maⁿ rey ye^{n'}ē vaadī 'diīiⁿ.

³ Nguéé canee nguūⁿ chεε chi chεεcú Melquisedec, chεε chi chiidá yā ndíi nguéé ndúú ye^{n'}e 'iiⁿyāⁿ ye^{n'}é yā ye^{n'}e chi chiicá yā. Nguéé canee nguūⁿ ye^{n'}e tiempo chi ch'iindiyáaⁿ yā ndíi nguéé ndúú ye^{n'}e tiempo chi ch'iī yā. Ní cucáávā chuū Melquisedec miiⁿ tan'dúúcā daiyá Ndyuūs 'tiicá yā ti 'áámá chiiduú ch'εεε ca chi 'áámá cūneeⁿ na ntiiⁿnyuⁿ cue^{n'}e daāⁿmaⁿ.

4 Maaⁿ ní nadacádínnuuⁿ nī chi ch'εεε n'dai saⁿā Abraham 'cūū. Abraham ca'a yā 'áámá ndiichi parte yeⁿ'ē nducuéⁿ'ē chi divíi yā yeⁿ'e reyes taachi cuⁿ'u yā na caāndaá.

5 'Tíicā ngaⁿā ley yeⁿ'e Ndyuūs chi Moisés dingúuⁿ yā: Nducyaaca chiiduú chi yeⁿ'e ndaata yeⁿ'ē 'iiⁿ'yāⁿ Leví canéé chi cuta'á yā ndíichí parte yeⁿ'e nducuéⁿ'ē chi véé yeⁿ'e nducyáácá 'iiⁿ'yāⁿ chí yeⁿ'e Abraham ní yeⁿ'e 'iiⁿ'yāⁿ yeⁿ'e ndaata yeⁿ'é yā, ti 'iiⁿ'yāⁿ Leví miiⁿ ní yeⁿ'ē ndaata Abraham.

6 Naati chiiduú ch'εεε ca Melquisedec miiⁿ ní nguéé yeⁿ'e 'iiⁿ'yāⁿ Leví naati sta'á yā ndíichí parte yeⁿ'e Abraham. Ní Abraham miiⁿ ní saⁿā chi Ndyuūs díiⁿ yā compromiso ndúúcū sa chi véé chi cuuví yeⁿ'e sa. Ní chiiduú ch'εεε ca Melquisedec di'viicú yā Abraham.

7 Maaⁿ ní Melquisedec chí di'viicú yā Abraham ní ch'εεε cá yā nguéé ti Abraham chí di'viicú yā 'yā.

8 Maaⁿ ní 'iiⁿ'yāⁿ Leví chi ita'á yā chi ndiichi parte yeⁿ'e nducuéⁿ'ē chi vεε yeⁿ'e yú, ní 'iiⁿ'yāⁿ chí caⁿ'á yā 'cuūvi yā. Naati canéé nguūⁿ na libro yeⁿ'é Dendyuūs 'tíicā chi chiiduú ch'εεε ca Melquisedec chí sta'á yā ndiichi parte yeⁿ'é 'iiⁿ'yāⁿ ní nguéé ngaⁿā chí n'díi yā.

9 Ní chuū ní nen'e caaⁿ'māⁿ chi taachi Abraham ca'á yā ndiichi parte yeⁿ'é yā chiiduú ch'εεε ca Melquisedec, maaⁿ tiempo nūuⁿ 'iiⁿ'yāⁿ yeⁿ'e Leví chi yeⁿ'ē ndaata Abraham ní 'iiⁿ'yāⁿ chí sta'á yā ntúūⁿ chí ndiichi parte yeⁿ'é yā. 'Tiicá ntúūⁿ ca'a yā chí ndiichi parte yeⁿ'é yā chiiduú ch'εεε ca Melquisedec.

10 Ní 'áará chí saⁿā Leví miiⁿ 'āā cuéé 'cuundiyaāⁿ sa, Abraham miiⁿ díiⁿ yā chuū cáávā 'iiⁿ'yāⁿ yeⁿ'é

yā chi 'āā cuéé 'cuundiyáaⁿ yā taachi ndaācā sa chiiduú ch'εεε ca Melquisedec cuaaⁿ na yúúní, ní ca'á yā chi ndiichi parte miiⁿ.

11 Maaⁿ ní 'iiⁿyāⁿ s'eeⁿ yeⁿe ndaata Israel sta'á yā ley yeⁿ'é yā yeⁿ'ē chiiduú s'eeⁿ chi yeⁿ'ē ndaata Leví. Ní 'iiⁿyāⁿ Leví s'eeⁿ ní yeⁿ'e ndaata Aarón. Ní nduuti chi 'iiⁿyāⁿ Leví s'eeⁿ cuuvi díiⁿ yā chi nducyaaca 'iiⁿyāⁿ cuuvi 'cuεεtinéé n'daacá yā ní nguéé nuuⁿndi yeⁿ'é yā, ¿de'ē cáávā chi neⁿ'é yā táámá chiiduú ch'εεε ca chí 'āā vi'í cā ní nguéé yeⁿ'ē ndaata chiiduú Aaron? Naati tan'dúúcā chiiduú ch'εεε ca Melquisedec, 'tiicá yā.

12 Caati naachi n̄'daaⁿ yā chiiduú ch'εεε ca yeⁿ'ē táámá ndaata yeⁿ'e 'iiⁿyāⁿ Israel 'tiicá ntúūⁿ canee chi n̄'daa yā ley.

13 Ná libro yeⁿ'é Ndyuūs 'tíicā canéé nguūⁿ yeⁿ'e Señor yeⁿ'e yú. Señor ní yeⁿ'ē táámá 'iiⁿyāⁿ chi nguéé díiⁿ yā ntiiⁿnyuⁿ yeⁿ'e chiiduú chi díiⁿ ntiiⁿnyuⁿ yeⁿ'ē nátai naachi 'caaⁿnúⁿ yā 'iiti cáávā yeⁿ'e ofrenda yeⁿ'e Ndyuūs.

14 Nducyaaca 'iiⁿyāⁿ ní déénu yā chi Señor Jesucristo yeⁿ'ē yú ch'iindiyáaⁿ yā yeⁿ'ē 'iiⁿyāⁿ yeⁿ'e Judá. Ní Moisés nguéé ngaⁿ'a yā de'ē vεε yeⁿ'e 'iiⁿyāⁿ yeⁿ'e Judá taachi cāⁿ'a yā yeⁿ'e chiiduú yeⁿ'e ndaata yeⁿ'é yā.

15 Ní neené cuaacu ca canee taachi ndaā táámá chiiduú chí tan'dúúcā chiiduú ch'εεε ca Melquisedec, 'tíica yā.

16 Ní táámá chiiduú miiⁿ nguéé díiⁿ yā ntiiⁿnyuⁿ yeⁿ'ē chiiduú cáávā ley chi ngaⁿ'a chi chiiduú miiⁿ canee chi cuuvi yeⁿ'e 'iiⁿyāⁿ yeⁿ'e ndaata yeⁿ'e chiiduú. Naati táámá chiiduú miiⁿ díiⁿ yā ntiiⁿnyuⁿ

yeⁿē chiiduú cáávā chi véé vida cueⁿe daāⁿmaⁿ
yeⁿé yā ní véé poder yeⁿé yā.

17 'Tíicā canee nguūⁿ na libro yeⁿé Ndyuūs
naachi Ndyuūs ngaⁿá yā yeⁿe yā 'tíicā:

Díí ní 'áámá chiiduú chi cuéⁿé daāⁿmaⁿ 'áámá
cūnee na ntiiⁿnyuⁿ. Tan'dúúicā chiiduú
ch'εετε ca Melquisedec 'tiicá nī.

18 Maaⁿ ní ley yeⁿe Moisés ní nguéé ley yeⁿē maaⁿ
caati nguéé dichííⁿvē.

19 Ley yeⁿe Moisés nguéé cuuvi diiⁿ chi 'iiⁿyāⁿ
'cuεetinéé n'daaca yā chi nguéé nuuⁿndi yeⁿé
yā. Naati maaⁿ ná lugar yeⁿē ley miiⁿ véé 'vi-
ich'εεtíínūⁿ chi n'daacā ca chi cuuvi yeⁿē yú chi
Ndyuūs tee yā s'uuúⁿ. Ní cáávā chuū ndaa yú
nanááⁿ Ndyuūs.

20 Ní Ndyuūs, cáávā chi duuchi maáⁿ yā, caⁿ'a yā
chi diíⁿ yā chi Jesucristo chiiduú ch'εετε ca. Tanáⁿá
ca chiiduú diíⁿ yā ntiiⁿnyuⁿ tan'dúúicā chi ngaⁿ'a
reglas yeⁿe 'iiⁿyāⁿ nguéé cáávā mar 'áámá nombre
yeⁿé Ndyuūs. Naati yeⁿē táámá chiiduú ch'εετε ca
chi Jesucristo, Ndyuūs ngaⁿá yā yeⁿe Jesucristo
ndúúicū chi duuchi maáⁿ yā chi canéé yā 'áámá
chiiduú ch'εετε ca.

21 'Tíicā canéé nguūⁿ na libro yeⁿé Ndyuūs
naachi Ndyuūs ngaⁿ'a yā yeⁿē taama yā:

Señor Ndyuūs ngaⁿá yā ndúúicū chi duuchi maáⁿ
yā ní nguéé n'dáaⁿ yā chi ngaⁿ'a yā. Díí
ní cuéⁿé daāⁿmaⁿ canéé dí chi dii ní 'áámá
chiiduú dii tan'dúúicā chiiduú ch'εετε ca
Melquisedec 'tíicā di.

22 Maaⁿ ní cucáávā chi Ndyuūs diíⁿ yā chuū, Jesús
ní diíⁿ yā chi seguro canee compromiso yeⁿé

Ndyuūs. Ní n'daacā ca nguée ti chi vmnááⁿ vmnaaⁿ chi yeⁿ'é 'iiⁿ'yāⁿ s'eeⁿ.

23 'Tiicá dendú'ū neené 'yaaⁿ chiiduú vεε naati nguée ch'εtinée yā ndúúcū ntiiⁿnyuⁿ caati ch'īi yā.

24 Naati Jesucristo miiⁿ nguée ch'īi yā ti 'áámá canee yā. Ní nguée ca'á yā táámá 'iiⁿ'yāⁿ ntiiⁿnyuⁿ chi yeⁿ'é yā.

25 Maaⁿ ní Jesucristo cuuvi nadanguáⁿ'ai yā cueⁿ'e daāⁿmaⁿ nducyáácá 'iiⁿ'yāⁿ chi ndaa yā nanááⁿ Ndyuūs cáávā Jesucristo miiⁿ. Níicú Jesucristo miiⁿ canduuchi yā cueⁿ'e daāⁿmaⁿ ní ngaⁿ'angua'á yā cáávā 'iiⁿ'yāⁿ s'eeⁿ chi yeⁿ'é yā.

26 'Tíicā Jesús miiⁿ ní chiiduú ch'εεε ca chi itée yā necesidades yeⁿ'e yú. Ní dεεve yā. Ní nguée diíⁿ yā cosas chi nguée n'daacā. Ní nguée diíⁿ yā mar 'áámá nuuⁿndi. Jesucristo miiⁿ 'āā vi'í ca yā yeⁿ'e 'iiⁿ'yāⁿ chi dinuuⁿndi yā. Ní cueⁿ'é yā yaācu cá nguée tí nanguuvi.

27 Ní Jesucristo chi chiiduú ch'εεε ca nguée canée chí diíⁿ yā tan'dúúcā tanáⁿ'ā chiiduú n'gεεε ca chi 'caaⁿ'núⁿ yā 'iiti nguuvi nguuvi cáávā nuuⁿndi yeⁿ'e maáⁿ yā ní cuayiivi cáávā nuuⁿndi yeⁿ'e tanáⁿ'ā ca 'iiⁿ'yāⁿ. Jesús miiⁿ 'áámá vmnéⁿ'ēe diíⁿ yā chuū taachi nca'a vida yeⁿ'e maáⁿ yā taachi ch'īi yā cáávā nuuⁿndi yeⁿ'e yú.

28 Cáávā ley yeⁿ'e Moisés 'iiⁿ'yāⁿ i'néeⁿ yā chiiduú n'gεεε ca chi 'iiⁿ'yāⁿ chí véé nuuⁿndi yeⁿ'é yā. Chó'ōo 'naaⁿ tiempo ní cuayiivi ní Ndyuūs ngaⁿ'á yā cáávā chi duuchi maáⁿ yā chi daiyá yā ní chiiduú ch'εεε ca chí diíⁿ yā chiiⁿ chi Ndyuūs neⁿ'é yā chí diíⁿ yā. Ní 'áámá cūnee yā cueⁿ'e daāⁿmaⁿ.

8

Jesucristo ní abogado ye^{n'}ē táámá compromiso

¹ Chuū chi ca^{n'}a 'nū ní ch'εεεε ca ye^{n'}e tanducué^{n'}ē chi nga^{n'}á 'nū chi 'tíicā. Chiiduú ch'εεεε ca ye^{n'}e yú chi Jesucristo ní véé yā ná va'ai chεεti nguuvi na lado ye^{n'}ē honor ye^{n'}e trono ye^{n'}é Ndyuūs chí canéé na va'ai chεεti nguuvi.

² Ní Jesucristo diíⁿ yā ntiiⁿnyuⁿ ye^{n'}ē chiiduú ch'εεεε ca na yaācū na va'ai ch'εεεε nguuvi chí cuaacu níⁿnyúⁿ chí ye^{n'}é Ndyuūs. Ní 'iiⁿyāⁿ s'eenⁿ nguéé din'dái yā yaācū miiⁿ ti Señor Jesucristo maáⁿ yā din'dái yā.

³ 'Iiⁿyāⁿ s'neéⁿ yā ca'áámá cā'aama chiiduú ch'εεεε ca chí canéé chí ca'á yā ofrenda ní 'caan'núⁿ yā 'iiti cáávā nuuⁿndi ye^{n'}é 'iiⁿyāⁿ. Cáávā chuū Jesucristo canéé chí véé ye^{n'}é yā chí cuuví ca'a yā chí vida ye^{n'}e maáⁿ yā.

⁴ Ní ndúútí chí Cristo miiⁿ cunée yā iⁿ'yeeⁿdí 'cūū nguéé cuuvi chiidúú yā caati véé chiiduú s'eenⁿ chí nga'a yā ofrendas nanááⁿ Ndyuūs tan'dúúcā chí nga^{n'}a ley ye^{n'}e Moisés.

⁵ Ní chiiduú s'eenⁿ ní diíⁿ yā ntiiⁿnyuⁿ ye^{n'}é yā ní diíⁿ yā tan'dúúcā ntiiⁿnyuⁿ ye^{n'}e yaācū chí canéé na va'ai ch'εεti nguuvi. Deenú 'nū chí diíⁿ yā copiar ntiiⁿnyuⁿ ye^{n'}é Ndyuūs ti taachi Moisés ne^{n'}é yā din'dái yā yaācū chí va'ai tínūⁿ, Ndyuūs ca^{n'}a yā chí yā Moisés ní nga^{n'}a yā:

Dii, Moisés, candéε nī cuidado ye^{n'}ē tanducué^{n'}ē chí diiⁿ di. Ní diiⁿ di tan'dúúcā chí ch'i^{n'}í dii taachi canee di na cuéé^{n'}tí.

⁶ Naati Cristo chí chiiduú ch'εεεε ca ye^{n'}e yú diíⁿ yā ntiiⁿnyuⁿ chí ch'εεεε taavi ca nguéé ti ye^{n'}e chiiduú

n'gεεε ca ye^{n'e} i^{n'}yee^{ndí} 'cūū caati Ndyuūs diíⁿ yā compromiso chi Cristo canéé yā naavta^{n'ā} ye^{n'e} 'ii^{n'}yāⁿ ye^{n'e} i^{n'}yee^{ndí} 'cūū ndúú^{cū} Ndyuūs. Maaⁿ ní s'uuúⁿ cuuvi ndaa yú nanááⁿ Ndyuūs cáávā Cristo miiⁿ. Ní compromiso miiⁿ ní ch'εεε ca tí ye^{n'e} tanducué^{n'ē} chi n'daacā taavi ca.

⁷ Ní nduuti chí compromiso chi vmnááⁿ vmnaaⁿ chi ye^{n'é} Ndyuūs ní n'daacā taavi ca tuu'mi ní nguéé canee chi diíⁿ yā ndiichí ndii 'úúví compromiso.

⁸ Naati Ndyuūs n'diichi yā chi nguéé n'daacā diíⁿ 'ii^{n'}yāⁿ tiempo chi 'āā chó'ōo. Ní nga^{n'á} yā ngī yā 'ii^{n'}yāⁿ s'eeⁿ tan'dúú^{cā} chi canéé nguūⁿ na libro ye^{n'é} yā 'tíicā:

'Tíicā nga^{n'a} Señor: Tiempo chi cuchii 'úú ní diíⁿ 'áámá compromiso ngaí ndúú^{cū} 'ii^{n'}yāⁿ ye^{n'e} ndaata Israel ní ndúú^{cū} 'ii^{n'}yāⁿ ye^{n'e} ndaata Judá.

⁹ Nguεε idiíⁿ tan'dúú^{cā} chi diíⁿ ndúú^{cū} chiidá yā taachi divíi 'ii^{n'}yāⁿ ye^{n'e} yá^{n'āa} Egipto. 'Ii^{n'}yāⁿ s'uuⁿ nguéé diíⁿ yā tan'dúú^{cā} chi 'úú yaa'ví 'ii^{n'}yāⁿ s'uuⁿ. Ní cáávā chuū nguéé diíⁿ cuenta ye^{n'é} yā.

¹⁰ Cuayiivi chi chó'ōo nguuvi s'eeⁿ ní maaⁿ ní chuū chí compromiso ngaí chí ca^{n'á} diíⁿ ndúú^{cū} 'ii^{n'}yāⁿ ye^{n'e} nación Israel. Nga^{n'a} Señor: Cu'neéⁿ leyes ye^{n'é} na vaanicadiínūⁿ ye^{n'é} yā ní dinguúⁿ leyes ye^{n'é} na staava ye^{n'é} yā. Ní 'úú cuuvi Ndyuūs ye^{n'é} yā, ní 'ii^{n'}yāⁿ s'eeⁿ cuuvi 'ii^{n'}yāⁿ ye^{n'é}.

¹¹ Ní mar 'áámá yā canee chí ca'cueéⁿ yā 'ii^{n'}yāⁿ ye^{n'e} nación ye^{n'é} yā 'tíicā. Ndís'tiī n'diichí nī Señor miiⁿ, caati nducyáácá yā ní n'diichí yā

'úú ndíí 'iiⁿyāⁿ chi ngaⁿ'ā ntiiⁿnyúⁿ yā ndii taná'a 'iiⁿyāⁿ.

12 Ní 'úú ní nadach'εεcú nuuⁿndi chi diíⁿ yā ní 'āā ntéé nn'gaacú nuuⁿndi yeⁿ'é yā.

13 Ní Ndyuūs ngaⁿ'a yā yeⁿ'ē compromiso chi ngai ti caati compromiso chi vmnááⁿ vmnaaⁿ ní 'āā ndiicúū tuu'mi ní deenu yú chi dendú'ū chi 'āā ndiicúū ní 'āā nuúⁿ 'cuiinu.

9

Yeⁿ'e yáacū na iⁿ'yeeⁿdí 'cūū ní yeⁿ'ē yáacū na va'ai chεeti nguuvi

1 Cuáácú chi véé reglas yeⁿ'e compromiso chi vmnááⁿ vmnaaⁿ ndúúcū yaācū chi 'iiⁿyāⁿ s'eeⁿ din'dái yā naachi dich'εεεε yā Ndyuūs.

2 Din'dái yā yaācū yeⁿ'e tínnūⁿ ndúúcū 'uuví cuartos. Cuarto chi vmnááⁿ vmnaaⁿ ní nguuvi Lugar Dεενε. Ní chεeti cuarto miiⁿ véé 'áámá candelero ndúúcū 'áámá mesa, ní vmnaaⁿ mesa véé pan chi ofrenda yeⁿ'é Ndyuūs.

3 Ná cuarto chi yaānūⁿ táámá lado yeⁿ'e cortina yeⁿ'e tínnūⁿ nguuvi Lugar Dεενε N'dai Ca Yeⁿ'é Ndyuūs.

4 Na cuarto miiⁿ véé 'áámá nátaī yeⁿ'e 'diiⁿnguāaⁿ naachi chiiduú ch'εεεε ca ngíⁿ'í yā cúⁿ'úyaa. Ní míⁿ canéé 'áámá caja chi yeⁿ'ē compromiso. Ndu-cuéⁿ'ē lados yeⁿ'e caja miiⁿ ní candúū 'diiⁿnguāaⁿ vmnááⁿ yeⁿ'ē. Chεeti caja miiⁿ véé chíité yeⁿ'ē 'diiⁿnguāaⁿ ní miiⁿ snúūⁿ pan chi nguuvi maná. Ní chεeti caja ntúūⁿ canéé nduucu chi nanguaaⁿnu chi yeⁿ'e Aarón ndúúcū 'úúví tablas yeⁿ'é tuū naachi canéé nguūⁿ ley chi diíⁿ Ndyuūs.

5 Vmnaaⁿ caja miiⁿ canéé 'uūvī querubines tan'dúúcā ángeles ndúúcū ngεεchí yā. Ní miiⁿ Ndyuūs canéé yā. Ní canéé 'cutií yeⁿ'e ngεεchí yā yeⁿ'ē vmnaaⁿ cuaaⁿ naachi Ndyuūs nadich'εεcú yā nuuⁿndi yeⁿ'ē nducyaaca 'iiⁿ'yāⁿ. Maaⁿ ní yeⁿ'é chuū nguéé cuuvi caaⁿ'máⁿ yeⁿ'ē tanducuéⁿ'ē maaⁿ.

6 'Tíicā chiiduú s'eeⁿ idiíⁿ yā nducuéⁿ'ē. Nguuvi nguuvi chiiduú s'eeⁿ ngéⁿ'e yā na cuarto vmnááⁿ vmnaaⁿ ní diíⁿ yā ntiiⁿnyuⁿ yeⁿ'é yaācū yeⁿ'é Ndyuūs.

7 Ní na cuarto chi yaānūuⁿ miiⁿ chi ndii 'úúví dámaāⁿ chiiduú ch'εεε ca indaá yā 'áámá vmneⁿ'éé nūuⁿ ca'áámá ca'áámá nduuyū. Ní canéé chí candéé yā yuūúⁿ yeⁿ'e 'iiti chí ca'a yā ofrenda Ndyuūs cáávā nuuⁿndi yeⁿ'é yā ní cáávā nuuⁿndi yeⁿ'ē tanáⁿ'ā 'iiⁿ'yāⁿ.

8 Espíritu N'dai yeⁿ'é Ndyuūs ch'iⁿ'í yā s'uuúⁿ chí nguéé cuuvi ndaa yú nanááⁿ Ndyuūs néⁿ'é chí canéé yaācū yeⁿ'e tíinūuⁿ caati yaacu tíinūuⁿ miiⁿ ní yeⁿ'e compromiso chí vmnááⁿ vmnaaⁿ.

9 Ní nducuéⁿ'ē chuū chí diíⁿ chiiduú s'eeⁿ ní ca-nee tan'dúúcā 'áámá ejemplo yeⁿ'ē tiempo yeⁿ'e yú. Chiiduú s'eeⁿ ní ca'a yā ofrendas nanááⁿ Ndyuūs ndúúcū 'iiti chí n'giiⁿ'núⁿ yā cáávā ofrendas yeⁿ'ē nuuⁿndi yeⁿ'é yā. Chuū ní neⁿ'ē caaⁿ'maⁿ chí ofrendas ndúúcū 'iiti chí n'giiⁿ'núⁿ yā ní ca'a yā Ndyuūs nguéé cuuvi diiⁿ chí staava yeⁿ'e 'iiⁿ'yāⁿ s'eeⁿ ní δεενε neⁿ'e chí 'tíicā chí nga'a yā ofrendas nanááⁿ Ndyuūs.

10 'Iiⁿ'yāⁿ s'eeⁿ dich'εεté yā Ndyuūs dámaāⁿ ndúúcū cosas chí che'é yā ndúúcū cosas chí cu'u yā ndúúcū chiiⁿ chí diíⁿ yā chí cuuvi δεεvé yā staava

ye^{n'}é yā. Nducué^{n'}ē chuū ní reglas chi diíⁿ yā ní canee chi diíⁿ yā 'tíicā ndii tiempo chi Ndyuūs n̄'daaⁿ yā dendu'ū ye^{n'}ē.

11 Cristo ní 'āā ndāa yā i^{n'}yee^{n'}dí 'cūū. Ní maaⁿ ní Cristo miiⁿ ní chiiduú ch'εεεε ca ye^{n'}e dendú'ū chi n'dai taavi ca. Ní yaācū naachi Cristo diíⁿ yā ntiíⁿnyuⁿ ní ch'εεεε taavi ca ní n'daacā ca nguéé ti yaācū ye^{n'}e tíínūⁿ chi ye^{n'}ē i^{n'}yee^{n'}dí 'cūū. Ní 'ii^{n'}yāⁿ s'eeⁿ nguéé n'dái yā yaācū chí ch'εεεε ca.

12 Ní Cristo ndāa yā chεεeti yāacū ndíi cuarto yaānūⁿ chí nguuvi Lugar Dεεεε N'dai Ca Ye^{n'}é Ndyuūs. Nguéé sndéé yā ndúúⁿcū yuuúⁿ ye^{n'}e 'iiti chí chivo o daiyā vaca chi n'gii^{n'}nuⁿ yā naati ndúúⁿcū yuuúⁿ ye^{n'}e maáⁿ yā. Ní 'tíicā sndāa yā dámaāⁿ 'aama vmné^{n'}ēe na Lugar Dεεεε N'dai Ca Ye^{n'}é Ndyuūs cáávā nducyaaca 'ii^{n'}yāⁿ. Ní maaⁿ ní nadanguá^{n'}ai yā s'uuúⁿ chí cuuvi ye^{n'}é yā s'uuúⁿ cue^{n'}e daāⁿmaⁿ.

13 Cuáácú chí yuūⁿ ye^{n'}e itiindu ndúúⁿcū yuūⁿ ye^{n'}e chivo ndúúⁿcū yaiyāā ye^{n'}e daiya vaca chí 'āā ngiichi vmnaaⁿ nátaī ní chiiduú s'eeⁿ ch'eeⁿ ndái yā vmnaaⁿ 'ii^{n'}yāⁿ chí véé nuuⁿndi ye^{n'}é yā ti yuūúⁿ cuuvi nadivεεεε 'ii^{n'}yāⁿ cáávā ley ye^{n'}é yā.

14 Ní chuū ní cuaacu. Maaⁿ ní nééné n'daacā ca chí cuuvi diíⁿ yuūúⁿ ye^{n'}e Cristo nguéé ti yuūúⁿ ye^{n'}é 'iiti. Cucáávā Espíritu N'dai ye^{n'}é Ndyuūs chí canduuchi cue^{n'}é daāⁿmaⁿ, Cristo diíⁿ yā ofrecer cuerpo ye^{n'}e maáⁿ yā chí 'ii^{n'}yāⁿ s'eeⁿ 'caa^{n'}nún yā yā cáávā ofrenda ye^{n'}é Ndyuūs, ofrenda chí n'daacā ye^{n'}ē. Ní yuūúⁿ ye^{n'}e Cristo ní cuuvi didεεεε staava ye^{n'}ē yú ye^{n'}e nducué^{n'}ē chí nada-cadííⁿuuⁿ yú chí nguéé n'daacā. Ní 'íícú cuuvi s'uuúⁿ ní dichíí'vē yú Ndyuūs chí canduuchi.

15 Cáávā chi Jesucristo diín yā 'áámá compromiso chi ngai, Jesucristo canéé yā naavtá'nā ye'n'e 'ii'n'yān ye'n'e i'n'yee'ndí 'cūū ndúúcū Ndyuūs. Ní maa'n ní cuuvi ndaa yú nanáán Ndyuūs. Ní cáávā chi ch'i'i Cristo, Cristo ní cuuvi nadach'εεcú yā nuu'ndi ye'n'e 'ii'n'yān chi cuneé yā máán compromiso chi vmnáán vmnaa'n. Ní 'ii'n'yān chi Ndyuūs yaa'ví yā chi cuuvi ye'n'é yā, 'ii'n'yān s'ee'n cuuvi cuta'a yā chi cuuvi ye'n'é yā chi 'áámá cūnee chi Ndyuūs ca'á yā 'ii'n'yān cucáávā Cristo.

16 Taachí 'ii'n'yān s'neen yā escrito ye'n'e herencia ye'n'é yā chi ca'n'a yā ca'a yā taamá yā, 'ii'n'yān mii'n canee chi 'cuūvi yā vmnáán vmnaa'n chi dichí'vē chii'n chi canéé nguū'n. Chuū ní tan'dúúcā 'áámá compromiso chi diín yā.

17 'Ii'n'yān chi s'neen escrito ye'n'e herencia ye'n'é yā chi ca'n'á yā ca'a yā taama yā, nguéé dichí'vē escrito ye'n'é yā ne'n'e tiempo chi canduuchí yā. Naati taachi 'aā n'dīi yā tuu'mi ní dichí'vē chuū. Ní tan'dúúcā 'áámá compromiso chi diín yā 'tíicā escrito mii'n.

18 Ní 'tíicā chíin chi dichí'vē compromiso chi diin Ndyuūs vmnáán vmnaa'n nduuti chi véé yuūú'n ti ch'ii'n'nú'n yā 'iiti.

19 Moisés ca'n'a sa chii sá nducyaaca mandamiento ye'n'e ley. Cuayiivi ní 'ii'n'yān caa'nú'n yā 'iiti ní Moisés sta'a sa yuūú'n ye'n'é daiya vaca ndúúcū yuūú'n ye'n'é chivo ní ndásta'n'a sa nuū'nīn ndúúcū yuūú'n. Cuayiivi ní sta'á sa yuūú'n ndúúcū duūdū 'iiti cuūchī ndúúcū 'áámá yaatā chi duuchi hisopo. Ní s'neén yā yuūú'n vmnaa'n libro ye'n'e ley ní vmnaa'n ye'n'é nducyaaca 'ii'n'yān dendú'ū.

20 Ní nga'n'á Moisés 'tíicā: Chuū ní yuūú'n chi

'áamá sello yeⁿe chí cuuvi cuaacu compromiso chi Ndyuūs ca'a yā orden chi ndís'tiī canee chi díiⁿ nī 'tíicā.

21 "Tiicá ntūⁿ Moisés s'neeⁿ sa yuūⁿ miiⁿ vmnaaⁿ yeⁿe yaācū yeⁿe tíinūⁿ ní vmnaaⁿ yeⁿe tanducuéⁿ'ē dendu'ū chí ituneeⁿ na ntiiⁿnyuⁿ yeⁿ'é Ndyuūs.

22 Cuaacu chi tan'dúúcā chi ngaⁿ'ā ley 'téé 'téé nguéé nducuéⁿ'ē ní yuūⁿ diiiⁿ chi canéé δεενε nducuéⁿ'ē. Ní Ndyuūs nguéé nadich'εεcú yā 'iiⁿ'yāⁿ yeⁿe nuuⁿndi yeⁿ'é yā nduuti chí nguéé ndúúcū yuūⁿ yeⁿ'ē 'iiti chí 'caaⁿ'núⁿ chiiduú s'eeⁿ.

Jesucristo ca'á yā maaⁿ cuerpo yeⁿ'é yā chí 'iiⁿ'yāⁿ s'eeⁿ 'caaⁿ'núⁿ yā 'yā lado yeⁿ'e ofrenda

23 'Tíicā nducuéⁿ'ē dendú'ū yeⁿe iⁿ'yeeⁿdí 'cūū canéé chí ndúúví δεενε ndúúcū yuūⁿ yeⁿ'e 'iiti. 'Téé 'téé nduuvi δεενε tan'dúúcā δεενε na va'ai chεeti nguuvi. 'Tiicá ntūⁿ cuuvi ndaa yú na va'ai chεeti nguuvi nduuti chí δεενε yú ndúúcū yuūⁿ yeⁿ'e táámá yā chí Cristo chí ch'εετε taavi ca nguéé ti ndúúcū yuūⁿ yeⁿ'e 'iiti.

24 Cristo nguéé cueⁿ'é yā sndaa yā na 'áámá yaacū chí δεενε taavi ca chí nin'dái saⁿ'ā yeⁿ'e iⁿ'yeeⁿdí 'cūū. Yaācū yeⁿ'e iⁿ'yeeⁿdí 'cūū 'tεε 'téé tan'dúúcā yaācū chí δεενε taavi ca chí cuaacu níiⁿnyúⁿ chí yaācū yeⁿ'é Ndyuūs. Cristo cueⁿ'é yā sndaa yā na va'ai chεeti nguuvi ní miiⁿ canee yā nanááⁿ Ndyuūs lado yeⁿ'e s'uuúⁿ.

25 Saⁿ'ā chiiduú ch'εετε ca yeⁿ'ē iⁿ'yeeⁿdí 'cūū chí yeⁿ'e ndaata judíos chí Israel nduuyu nduuyu ndaá yā na Lugar δεενε N'dai Ca ndíí ná yaānūⁿ yeⁿ'e yaācū yeⁿ'e Ndyuūs ní ca'á yā

Ndyuūs ofrenda chi yuūúⁿ yeⁿ'e 'iiti, ní nguée^e yuūúⁿ yeⁿ'é yā chi ca'a yā. Naati Cristo ca'á yā vida yeⁿ'e maáⁿ yā caavā ofrenda 'áámá vmneⁿ'ée nūⁿ.

26 Nduuti chi Cristo canee chi diíⁿ yā tan'dúúcā chi idiíⁿ chiiduú ch'εεεε ca tuu'mi ní canée chi 'cuūvi yā n'deee n'dái cuuvi ndíí tiempo chi Ndyuūs din'dái yā iⁿ'yeeⁿdí 'cūū ndíí chi 'cuiñū íⁿ'yeeⁿdī. Naati nguée^e diíⁿ Cristo 'tíicā. Caati tiempo chi Ndyuūs s'neéⁿ yā ní Jesucristo 'áámá vmneⁿ'ée nūⁿ ch'íi yā ní ndāa yā nanááⁿ Ndyuūs chi nadach'εεcú yā nuuⁿndi yeⁿ'ē nducyaaca 'iiⁿ'yāⁿ cucáávā chi ca'a maáⁿ yā cuerpo yeⁿ'é yā chi 'iiⁿ'yāⁿ s'eeⁿ n'giiⁿ'núⁿ yā 'yā cáávā ofrenda.

27 'Tiicá ntūūⁿ nducyaaca 'iiⁿ'yāⁿ yeⁿ'e iⁿ'yeeⁿdí 'cūū canee chi 'cuūvi yā 'áámá vmnéⁿ'ēe. Níicú cuayiivi ní Cristo caⁿ'á yā n'diichí yā nuuⁿndi yeⁿ'e 'iiⁿ'yāⁿ s'eeⁿ.

28 Ní 'tíicā Cristo 'áámá vmnéⁿ'ēe ca'á yā cuerpo yeⁿ'e maáⁿ yā cáávā ofrenda chi nadich'εεcú yā nuuⁿndi yeⁿ'e nducyaaca 'iiⁿ'yāⁿ. Ní taachi caⁿ'á yā ndaa yā taama vmnéⁿ'ēe nguée^e ndaa yā cucáávā chi caⁿ'á yā nadííⁿve yā nuuⁿndi yeⁿ'e nducyaaca 'iiⁿ'yāⁿ. Naati caⁿ'á yā nadanguáⁿ'ai yā nducyaaca s'uuúⁿ chi canée ngiinu yú chi ndaa yā ndiichi ndii 'úúví cuuvi. Ndaa yā chi nadanguáⁿ'ai yā s'uuúⁿ.

10

1 Ní ley yeⁿ'e Moisés ní tan'dúúcā 'daā'nú nūⁿ 'tíicā ti nguée^e 'áámá cūnee. Ní nguée^e dáámá dáámá ndúúcū nducuéⁿ'ē vaadī cuaacu chi n'daacā chi cuchíi. Ti cáávā chi ngaⁿ'a ley miiⁿ 'iiⁿ'yāⁿ s'eeⁿ nduuyu nduuyu 'caaⁿ'núⁿ yā 'iiti cáávā ofrenda cucáávā nuuⁿndi yeⁿ'é yā. Ní cáávā chuū, ζtáácā

cuuvi ley miiⁿ diiⁿ chi 'iiⁿyāⁿ s'eeⁿ canéé n'daaca yā nanááⁿ Ndyuūs?

² Ti nduuti chi ley miiⁿ diiⁿ chi 'iiⁿyāⁿ s'eeⁿ canee n'daaca yā nanááⁿ Ndyuūs ní nguéeⁿ nuuⁿndi yeⁿ'é yā nanááⁿ Ndyuūs, tuu'mi ní 'āā ntéeⁿ 'caaⁿnúⁿ yā 'iiti cáávā nuuⁿndi yeⁿ'é yā. Ní nguéeⁿ nada-cadínuuⁿ yā yeⁿ'e chí chidεεvé yā yeⁿ'e nuuⁿndi yeⁿ'é yā.

³ Ní 'tíicā diiⁿ ley miiⁿ. Taachi n'giiⁿnúⁿ yā 'iiti nduuyu nduuyu tuu'mi ní nan'gáácú yā yeⁿ'é nuuⁿndi yeⁿ'é yā.

⁴ Ti ndúúcū yuūúⁿ yeⁿ'e 'itííndú ndúúcū yuūúⁿ yeⁿ'e chivo 'iiⁿyāⁿ s'eeⁿ nguéeⁿ cuuvi didεεvé yā yeⁿ'é nuuⁿndi yeⁿ'é yā.

⁵ Ní cucáávā chuū taachi ndaá Cristo na iⁿ'yeeⁿdí 'cūū ngaⁿ'á yā ngī yā yeⁿ'é nduudu yeⁿ'é Ndyuūs chi canéé nguūⁿ 'tíicā:

Díí, Ndyuūs, nguéeⁿ neⁿ'e di chi 'iiⁿyāⁿ 'caaⁿnunⁿ yā 'iiti lado yeⁿ'e ofrenda ndíí nguéeⁿ ndúú chi caⁿ'á yā 'iiti cáávā ofrenda yeⁿ'é di naati din'dái di 'áámá cuerpo yeⁿ'é chi ch'iindiyaáⁿ.

⁶ Ní nguéeⁿ neⁿ'e di ofrendas yeⁿ'é chi nguuchí yā cuerpo yeⁿ'é 'iiti nátaī, ní nguéeⁿ yeⁿ'é chi 'caaⁿnúⁿ yā 'iiti cáávā chi Ndyuūs nadach'εεcú yā nuuⁿndi yeⁿ'é yā.

⁷ Dii Ndyuūs, 'úú ndaá iⁿ'yeeⁿdí 'cūū chi cuuvi diíⁿ chεε chi neⁿ'e di chi diíⁿ caati 'tíicā canéé nguūⁿ yeⁿ'e 'úú na libro yeⁿ'e Ndyuūs naachi canéé nguūⁿ ley.

⁸ Vmnaáⁿ vmnaaⁿ ngaⁿ'a Cristo: Dii Ndyuūs nguéeⁿ neⁿ'e di ní nguéeⁿ yeenú di ndúúcū ofrendas yeⁿ'e chi n'giiⁿnúⁿ yā 'iiti, ní nguéeⁿ yeⁿ'e 'iiti chi tee yā

dii. Ndíí nguéé ndúú yeⁿe chi n'giiⁿ'núⁿ yā 'iiti ní ngiichí yā yuūtē yeⁿe 'iiti cáávā chi nadach'εecu di nuuⁿndi yeⁿ'é yā. 'Tíicā ngaⁿ'a Cristo 'áará chí 'iiⁿ'yāⁿ s'eeⁿ diíⁿ yā tan'dúúcā chi ngaⁿ'a ley miiⁿ yeⁿ'ē ofrenda chi canéé chi ca'á yā Ndyuūs.

⁹ Ní cuayiivi ngaⁿ'á Cristo: Dii, Ndyuūs, 'úú ndaá na iⁿ'yeeⁿdí 'cūū chi cuuvi diíⁿ chεē chi neⁿ'e di chi diíⁿ. Maaⁿ ní nducuéⁿ'ē chuū neⁿ'e caaⁿ'maⁿ 'tíicā. Ndyuūs divíi yā 'áámá lado ofrenda yeⁿ'e 'iiti chí 'iiⁿ'yāⁿ s'eeⁿ ch'iiⁿ'núⁿ yā. Ní na lugar yeⁿ'e ofrenda miiⁿ Ndyuūs ca'á yā Cristo chí ch'íi yā.

¹⁰ Maaⁿ ní Ndyuūs didεεvé yā s'uuúⁿ cáávā Jesucristo diíⁿ yā nducuéⁿ'ē chi Ndyuūs neⁿ'é yā chí diiⁿ yā. Ní 'áámá vmnéⁿ'ee nū^u Jesucristo ca'á yā cuerpo yeⁿ'e maáⁿ yā cáávā ofrenda chí 'iiⁿ'yāⁿ s'eeⁿ n'giiⁿ'núⁿ yā 'yā cáávā nuuⁿndi yeⁿ'e nducyáácá 'iiⁿ'yāⁿ.

¹¹ Ca'áámá cā'aama chiidūú judío chí Israel ngu- uvi nguuvi diíⁿ yā ntiiⁿ'nyuⁿ ní cheendii yā ní nga'á yā ofrenda dáámá daama nū^u nééné n'deēe cuūví 'áará chí ofrenda miiⁿ chí n'giiⁿ'núⁿ yā 'iiti nguéé cuuvi divíi nuuⁿndi yeⁿ'e 'iiⁿ'yāⁿ mar 'áámá vmnéⁿ'ēe.

¹² Naati Jesucristo 'áámá vmnéⁿ'ee nū^u ca'á yā maaⁿ cuerpo yeⁿ'é yā chí 'iiⁿ'yāⁿ s'eeⁿ n'giiⁿ'núⁿ yā 'yā caavā ofrenda yeⁿ'e nuuⁿndi yeⁿ'e nducyáácú 'iiⁿ'yāⁿ. Ní cuayiivi cueⁿ'é yā na va'ai chεeti nguuvi ní ch'iindí yā na lado yeⁿ'e honor yeⁿ'é Ndyuūs chí lado tá cuaacu.

¹³ Maaⁿ ní Jesucristo canee ngiinú yā chí ndaa tiempo chí Ndyuūs idiíⁿ yā chí nducyaaca 'iiⁿ'yāⁿ chí contra yeⁿ'é yā canéé yā maaⁿ ca'á Jesucristo tan'dúúcā chí 'áámá banco 'lííⁿ 'tiicá yā chí Jesu-

cristo cuchéε yā yeⁿe yā.

14 Ní cáávā chi Cristo ca'á yā cuerpo yeⁿe maáⁿ yā chi 'iiⁿ'yāⁿ s'eeⁿ n'giiⁿ'núⁿ yā 'yā 'áámá vmnéⁿ'ee nūⁿ cáávā ofrenda tuu'mi ní Cristo diíⁿ yā chi dáámá cuuvi dεεvέ 'iiⁿ'yāⁿ ti nadach'εεcú yā nuuⁿndi yeⁿ'é yā. Ní 'iiⁿ'yāⁿ s'eeⁿ ní yeⁿ'e Ndyuūs cueⁿ'e daāⁿmaⁿ.

15 Ní Espíritu N'dai yeⁿ'é Ndyuūs ngaⁿ'a ndúúcu yú chi nducuén^{'e} chuū ní cuaacu. Vmnááⁿ vmaāⁿ ngaⁿ'a Ndyuūs chuū:

16 Chuū chi diíⁿ prometer chi diíⁿ caavá yā cuayi-ivi chi chó'ōo nguuvi s'eeⁿ, ngaⁿ'a Ndyuūs. Cu'neéⁿ ley yeⁿ'é na staava yeⁿ'é yā. Ní dinguúⁿ ley yeⁿ'é na vaanicadíínūⁿ yeⁿ'é yā.

17 Ní cuayiivi ngaⁿ'á yā:

'Āā ntéé nan'gaacú nuuⁿndi yeⁿ'é yā ní nguéé ndu-
cuén^{'e} chi diíⁿ yā chi nguéé n'daacā.

18 Níícú taachi Ndyuūs nadich'εεcú yā nuuⁿndi yeⁿ'é 'iiⁿ'yāⁿ s'eeⁿ tuu'mi ní 'āā ntéé canéé chi ca'á yā ofrendas chi 'caaⁿ'núⁿ yā 'iiti cáávā nuuⁿndi yeⁿ'e yā.

Canéé chi nan'gaacu yú yeⁿ'e Ndyuūs yeⁿ'e yú

19 'Tíícā ní hermanos yeⁿ'é maaⁿ ní cuuvi nandaa yú nanááⁿ Ndyuūs na cuarto chi Dεεvε N'dai Ca na yaācū yeⁿ'é Ndyuūs ti véé 'viich'εεtíínūⁿ yeⁿ'e yú nanááⁿ Ndyuūs cáávā yuūúⁿ yeⁿ'e Señor Jesucristo.

20 Ní Jesucristo nn'guaaⁿ yā 'áámá yúúní chí n'dai ní canduuchi taachi chíí nteeⁿ yā tíínūⁿ yeⁿ'e yaācū. Tíínūⁿ miiⁿ ní neⁿ'e caaⁿ'maⁿ chi tan'dúúcā cuerpo yeⁿ'e maáⁿ Cristo taachí ch'i yā, 'tíícā va. Maaⁿ ní cuuvi ndaa yú na cuarto chi yaānūⁿ nanááⁿ Ndyuūs caavá yā.

21 Ní Jesucristo ní chiiduú ch'εεε ca yeⁿ'e yú ní diíⁿ yā ntiiⁿnyuⁿ yeⁿ'e yaācū yeⁿ'e Ndyuūs.

22 Maaⁿ ní canéé chí indaa yú nanááⁿ Ndyuūs ndúúcū núúⁿmáⁿ staava yeⁿ'e yú ní 'áámá canee yú ndúúcū chi i'téenu yú. Cristo miiⁿ 'āā didεενέ yā staava yeⁿ'e yú yeⁿ'e nuuⁿndi yeⁿ'e yú caati nguéé nadacadíínuuⁿ ca yú yeⁿ'e castigo yeⁿ'e nuuⁿndi chí diiⁿ yú. Ní nadidεενε yā cuerpo yeⁿ'e yú ndúúcū nuūⁿnīⁿ δεενε.

23 Maaⁿ ní diiⁿ yú chí 'áámá canee yú ndúúcū chí ngaⁿ'a yú chí i'téenu yú caati deenu yú chí Ndyuūs caⁿ'á yā diíⁿ yā cumplir compromiso yeⁿ'e chí caⁿ'a yā chí téé yā s'uuúⁿ.

24 Ní s'uuúⁿ canéé chí inadicadíínuuⁿ yú táácā cuuvi cunnee yú 'aama yú taama yú ní dineⁿ'e yú 'aama yú taama yú ní diiⁿ yú dendu'ū chí n'daacā.

25 Ní nguéé diiⁿ yú chí nguéé nduuvidaama yú chεεti yaācū tan'dúúcā chí diiⁿ náⁿ'a yā. Naati ca'a yú consejo 'aama yú taama yú caati deenu yú chí nguuvi chí ndaa Cristo taama vmnéⁿ'ēe 'āā snee niiⁿnuúⁿ.

26 Ní nduuti chí idiiⁿ yú nuuⁿndi caati maaⁿ yú neⁿ'e yú cuayiivi chí 'āā deenu yú nduudu cuaacu yeⁿ'é Ndyuūs tuu'mi ní 'āā ntεε véé taama ofrenda chí cuuvi ca'a yú Ndyuūs cáávā nuuⁿndi yeⁿ'e yú chí Ndyuūs diví yā nuuⁿndi yeⁿ'e yú.

27 Dámaāⁿ 'va'a yú neⁿ'e chí cunee ngiinu yú yeⁿ'e chí cuchíi. Cristo caⁿ'á yā n'diichi yā nuuⁿndi yeⁿ'e yú ní ndúúcū yaⁿ'ā íngiichi chí cuucu tanducuéⁿ'e 'iiⁿyāⁿ chí contra yeⁿ'é Ndyuūs.

28 Deenu yú yeⁿ'e 'iiⁿyāⁿ chí nguéé diiⁿ yā cuenta yeⁿ'e ley yeⁿ'e Moisés. Nduuti chí véé 'uuvī o 'iinū 'iiⁿyāⁿ chí ngaⁿ'ā nduudu cuaacu yeⁿ'e falta yeⁿ'é

yā tuu'mi ní ch'iī 'iiⁿ'yāⁿ miiⁿ. Ní nguéé ya'ai 'iiⁿ'yāⁿ s'eeⁿ taachi ch'iī yā.

²⁹ Maaⁿ ní nadacadíⁿnuuⁿ yú yeⁿ'e 'iiⁿ'yāⁿ s'eeⁿ chi nguéé dííⁿ yā cuenta yeⁿ'e yuūúⁿ yeⁿ'e Cristo chí cuuví δεεβε 'iiⁿ'yāⁿ s'eeⁿ. 'Iiⁿ'yāⁿ s'eeⁿ ngaⁿ'a taán yā yeⁿ'e Espíritu N'dai yeⁿ'é Ndyuūs. ¿De'ē chúúcā n'dee ca castigo véé yeⁿ'é 'iiⁿ'yāⁿ s'eeⁿ?

³⁰ Deenu yú chi Señor ní ngaⁿ'a yā 'tíicā: 'Úú canéé chí ca'á castigo 'iiⁿ'yāⁿ. 'Úú idiíⁿ chi 'iiⁿ'yāⁿ nadí'βε yā chiiⁿ chí dííⁿ yā chí nguéé n'daacā. Chuū dendú'ū ngaⁿ'a Señor miíⁿ: Señor miíⁿ caⁿ'á yā n'diichi yā nuuⁿndi yeⁿ'e 'iiⁿ'yāⁿ yeⁿ'é yā.

³¹ De'ē chúúcā ya'āi yeⁿ'e yú. Nééné 'va'a yú chi ndaa yú nanááⁿ Ndyuūs chí cānduuchi chí dííⁿ yā castigar s'uuúⁿ nduuti chí nguéé n'daacā idiíⁿ yú.

³² Maaⁿ ní n'gaacú nī yeⁿ'ē nguuvi s'eeⁿ chí 'āā chó'ōo chí caama n'diichí nī ní s'téenu nī Jesu-cristo, ní cuayiivi chí chéé nī ch'eenu nī chií yeⁿ'e tanducuéⁿ'ē dendu'ū cucáávā chí dííⁿ nī luchar yeⁿ'ē chí i'téenu nī.

³³ Náⁿ'a nī ch'eenú nī chií ní 'cuináaⁿ nī taachi 'iiⁿ'yāⁿ sta'á yā ndís'tiī ní ngaⁿ'a taán yā yeⁿ'e ndís'tiī ní ch'eⁿ'é yā ndís'tiī nanááⁿ n'dee n'dái 'iiⁿ'yāⁿ. Ní taachi 'tíicā dííⁿ yā ndúúcū naⁿ'ā hermanos yeⁿ'e yú neⁿ'é nī 'cuenú nī cuuvi nduucú yā.

³⁴ Ní taachi náⁿ'ā hermanos ch'eenú yā chií chí caneé yā vácū, ndís'tiī ní ya'ái nī hermanos s'eeⁿ. Ní taachí 'iiⁿ'yāⁿ sta'á yā nducuéⁿ'ē chí véé yeⁿ'e nī ndís'tiī ní chíchεε nī yeⁿ'e nducuéⁿ'ē. Ní yeenú nī caati deenú nī chí véé chí cuuvi yeⁿ'é nī chí n'dai taavi ca ná va'ai chεεti nguuvi chí cueⁿ'e daāⁿmaⁿ 'áámá cūnee yeⁿ'e nī.

35 Maaⁿ ní nguée di'vaachí nī ti nguée véé confianza yeⁿ'é nī ndúúcū Ndyuūs caati ndúúcū chi i'téenu nī cuuvi diíⁿ nī ganar cosas chi n'daacā taavi ca.

36 Ní ndís'tiī ní canée chi cuchéé nī yeⁿ'e nducuéⁿ'ē ní diíⁿ nī nducuéⁿ'ē chi Ndyuūs neⁿ'é yā chi diíⁿ nī. Ní 'íícú cuuvi cuta'á nī yeⁿ'e chi véé yeⁿ'é nī chi Ndyuūs caⁿ'a yā chi téé yā ndís'tiī.

37 Canée nguūⁿ na libro yeⁿ'é Ndyuūs 'tíicā:

'Āā ntεε 'nááⁿ tiempo ní Señor chi canée chi ndaa ní ndaa yā. Ní 'āā ntée cuuví 'náaⁿ yā.

38 Ní ngaⁿ'a yā 'tíicā:

'Iiⁿ'yāⁿ chi yeⁿ'é ní δεεvé yā tí i'téenu yā 'úú ní canduuchí yā cueⁿ'e daāⁿmaⁿ. Ní nduuti chi 'aama yā ndaacadaamí yā yeⁿ'é tuu'mi ní 'úú nguée yeenú yeⁿ'e yā.

39 Maaⁿ ní s'uuúⁿ ní nguée tan'dúúcā 'iiⁿ'yāⁿ chi ndaacadaamí yā yeⁿ'e Cristo ní chindai yā. Nguée 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿ'ai yā s'uuúⁿ.

11

Yeⁿ'e chi i'teenu yú Jesucristo

1 Cáávā chi i'teenu yú Ndyuūs deenu yú chi seguro chi cuta'a yú yeⁿ'ē chi canee ngiinu yú. Ní deenu yú chí cuuvi cuaacu yeⁿ'e dendu'ū chi nguée inaaⁿ yú.

2 Ní tiempo chi 'āā chó'ōo 'iiⁿ'yāⁿ ngaⁿ'á yā chi 'iiⁿ'yāⁿ chi diíⁿ yā ntiiⁿnyuⁿ yeⁿ'e Ndyuūs ní n'dááca yā nanááⁿ Ndyuūs ti i'téenu yā Ndyuūs.

³ Ní deenu yú cucáavā chi i'téenu yú Ndyuūs, chí chiiⁿ chí inaaⁿ yú ní cáavā chi Ndyuūs din'dái yā iⁿyee^{ndi} ní nguéé dε'ε vεε.

⁴ Ní cáavā chi saⁿā Abel ní i'téenu sa Ndyuūs, ca'a sa 'áámá ofrenda chí n'daacā ca nguéé ti saⁿa Caín miiⁿ. Ní Ndyuūs n'diichí yā chi ofrenda yeⁿe Abel miiⁿ ní n'daacā ca ní sta'á yā ofrenda miiⁿ. Ní Ndyuūs n'diichí yā chi Abel ní n'daacā sa. Ní cáavā chí Abel i'téenu sa Ndyuūs 'áará chí ch'iī saⁿā miiⁿ ndíí maaⁿ ní ngaⁿa 'iiⁿyāⁿ yeⁿe vaadī i'téenu yeⁿe sa.

⁵ Cáavā chi saⁿā Enoc i'téenu sa Ndyuūs, nguéé ch'iī sa ti Ndyuūs candéε yā saⁿā miiⁿ na va'ai chεεti nguuvi. 'Iiⁿyāⁿ yeⁿe yā 'āā ntéé ndaacá yā saⁿā miiⁿ ti Ndyuūs candéε yā saⁿā miiⁿ nduucú yā. Canéé nguūⁿ na libro yeⁿe Ndyuūs 'tíicā: Taachi 'āā cuéé candéé Ndyuūs saⁿā miiⁿ, Ndyuūs canee yiinú yā chí idiiⁿ sa.

⁶ Mar 'áámá 'iiⁿyāⁿ nduuti chi nguéé i'téenu yā Ndyuūs, Ndyuūs nguéé cunee yiinú yā 'iiⁿyāⁿ. Nduuti chi 'iiⁿyāⁿ neⁿe yā ndaa yā nanááⁿ Ndyuūs canee chí cu'téenu yā chí véé Ndyuūs. Ní Ndyuūs caⁿa yā chí ca'a yā chí véé chí cuuvi yeⁿe 'iiⁿyāⁿ chí n'nuúⁿ yā Ndyuūs.

⁷ Ní cáavā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chí caⁿá yā diiⁿ yā. 'Áará chí nguéé inaaⁿ sa cosas miiⁿ n'giindiveeⁿ sa nduudu yeⁿe Ndyuūs ní din'dái sa 'áámá arca chí barco ch'εεε ní 'íicú cuuví nanguáⁿāi 'iiⁿyāⁿ yeⁿe sa na vaacú sa. 'Túúcā Noé diiⁿ sa condenar 'iiⁿyāⁿ yeⁿe iⁿyee^{ndi} 'cūū caati i'téenu sa Ndyuūs.

Ní Ndyuūs didεενvé yā Noé chi cuuvi yeⁿé yā caati i'téenu sa Ndyuūs.

8 Ní cáávā saⁿā Abraham i'téenu sa Ndyuūs, ch'iindiveeⁿ sa nduudu yeⁿe Ndyuūs taachi Ndyuūs yaa'ví yā Abraham. Ní yaa'ví yā saⁿā chi canéé chí caⁿ'a sa táámá yáⁿāa chi caⁿ'a Ndyuūs chi cuuvi yeⁿé sa. Ní s'neeⁿ sa yāāⁿ vaacú sa ní cuéⁿe sa. Ní nguée déénu sá tíí ndíí caⁿ'a sa.

9 Ní cáávā chi Abraham i'téenu sa Ndyuūs, canee sa na yáⁿāa chi Ndyuūs caⁿ'a yā chi ca'a yā. Ní miiⁿ canee sa tan'dúúcā 'iiⁿ'yā chi canúúⁿ yúúⁿí. Ní canúúⁿ sá va'āí tíínūuⁿ ndúúcū daiya sa chi Isaac ndúúcū Jacob. Ní 'āā daamá nūuⁿ cuuvi yeⁿé yā yeⁿé chí cuuvi yeⁿe Abraham miiⁿ.

10 Abraham miiⁿ ní cūnee ngíínu sa yāāⁿ chi Ndyuūs 'āā din'dái yā tan'dúúcā chi Ndyuūs nadacádíínuuⁿ yā. Yāāⁿ miiⁿ chi 'áámá cūnee cimientu yeⁿé ní va'ai chεeti nguuvi.

11 Ní cáávā chi Sara i'téenu tá Ndyuūs, ní ditiínú ca tá chi taavi tá daiya tá. Sta'a tá poder yeⁿe Ndyuūs ní ch'iíndī daiya tá taachi 'āā ndiicū ta ti i'téenu tá chi Ndyuūs dííⁿ yā cumplir nduudu chi ngaⁿ'a yā.

12 Ní 'tíicā Abraham miiⁿ 'āā ndiicū ca yā chi cuuvi chiidá yeⁿe daiyá yā. Ní n'daataá yeⁿé yā chi Sara miiⁿ 'āā ndiicū ca ntúuⁿ tá. Naati ná 'iiⁿ'yāⁿ yeⁿé yā ichii n'deee n'daí 'iiⁿ'yāⁿ tan'dúúcā 'íínyúⁿ yeⁿe nanguuvi ní tan'dúúcā yáⁿāa ndúutíi chí véé cuaaⁿ 'diítuú yíícú chi s'uuúⁿ nguée ngii iduuche yú.

13 Nducyaaca 'iiⁿ'yāⁿ s'eeⁿ ch'íi yā naati i'téenu yā Ndyuūs. Nguée sta'á yā cosas chi Ndyuūs caⁿ'a yā

chi ca'a yā naati i'téenu yā ní n'diichi chi ya'n'ái yā cosas chi Ndyuūs ca'n'a yā chí ca'a yā. Ní yeenú yā. Ní 'ii'yān s'ee'n nga'n'a yā chii yā nducyáácá 'ii'yān chi tan'dúúcā 'ii'yān chi snúún yúúmi, 'tiicá yā 'naa'n tiempo chi snée yā i'n'yee'ndí 'cūū.

14 Ní nducyaaca 'ii'yān chi nga'n'á yā 'tíicā ch'i'n'i yā chi in'nuún yā táámá nación chí n'dai chí cuuvi ye'n'e yā.

15 Ní nduuti chi nn'gaacú yā ye'n'e yá'n'āa naachi chiicá yā tuu'mi ní cuuvi nguεεcunée yā ní ndaa yā na yāān mii'n.

16 Naati 'ii'yān s'ee'n ne'n'é yā táámá nación chi n'daacā ca chí ye'n'ē va'ai chεεti nguuvi. Ní cáávā chuū Ndyuūs nguéé 'cuináa'n yā taachi 'ii'yān s'ee'n nga'n'a yā 'tíicā: N'diī Ndyuūs ní Ndyuūs ye'n'ē yú. Ndyuūs 'āā véeé yaá'n yā 'áámá yāān chi cuuvi ye'n'e 'ii'yān s'ee'n.

17 Ní cáávā chi Abraham mii'n i'téenu yā Ndyuūs, n'giindiveé'n yā ye'n'e Ndyuūs taachi Ndyuūs n'diichiné'n yā Abraham. Ní Abraham ní ca'n'á yā ca'á yā daiyá yā Isaac cáávā lado ye'n'e ofrenda chi 'caa'n'nú'n yā daiyá yā. Ní canee listo yā chi ca'á yā 'áámá n'dya'n'ā daiyá yā lado ye'n'e ofrenda mii'n 'áará chí Ndyuūs ca'á yā 'áámá compromiso chi 'tíicā:

18 Díí, Abraham, cáávā daiya di Isaac 'úú ní téé dii n'dee n'dái taavi cuuvi ndaata ye'n'e di.

19 Ní Abraham mii'n tuumicádíinuun yā chi Ndyuūs cuuví nadacuée'n yā 'ii'yān s'ee'n ye'n'ē nguaa'n tiná'n'ā. Ní Abraham déenu sa chi Ndyuūs cuuvi nadacuée'n yā daiya sa ye'n'ē nguaa'n tiná'n'ā, naati nguéé ch'iī sa. Abraham mii'n candéε sa daiya sa na vaacú sa.

20 Ní cáávā chi Isaac i'téenu sa Ndyuūs, ngaⁿ'a sa chi caⁿ'a sa di'viicú sa daiya sa Jacob ndúúcū saⁿ'ā Esaú. Ní ngaⁿ'ā sa yeⁿ'e cosas n'dai chi cuchii.

21 Ní cáávā chi Jacob i'téenu sa Ndyuūs, taachi 'āā cháā 'cuuvi sa di'viicu sa ca'áámá ca'áámá daiya yeⁿ'ē daiya José. Ní cuayiivi ní dich'εεεε sá Ndyuūs neⁿ'e chí sta'ā sa in'daacúú yeⁿ'ē sa. Ní yiin'diicúneeⁿ sa na in'daacúú yeⁿ'ē sa.

22 Ní cáávā chi José i'téenu sa Ndyuūs taachi 'āā cháā 'cuuvi sa ngaⁿ'a sa yeⁿ'e tiempo chi 'iiⁿ'yāⁿ yeⁿ'e ndaata Israel nan'dáa yā ná yáⁿ'āa Egipto. Ní yaa'vi sa 'iiⁿ'yāⁿ yeⁿ'e chi canéé chi diⁿ yā ndúúcū 'iini yeⁿ'e sa taachi tináⁿ'ā sa.

23 Ní cáávā chi i'téenu yā Ndyuūs chiida sa ní chεεcu sa Moisés, taachi ch'iindiyaāⁿ Moisés miiⁿ chinuun'dé'ei yā saⁿ'ā 'líⁿ miiⁿ na 'iinu 'iiyū. N'diichi yā daiyá yā chi Moisés miiⁿ saⁿ'ā 'líⁿ sa neené n'dεεvέε sa. Nguéé di'vá'a yā yeⁿ'e orden yeⁿ'e rey chi canéé chi 'caaⁿ'núⁿ yā saⁿ'ā 'líⁿ miiⁿ.

24 Cáávā chi Moisés i'téenu sa Ndyuūs, ní tááchí ch'εētē sa nguéé 'cuūⁿ sa chi 'iiⁿ'yāⁿ ngaⁿ'á yā chi Moisés ní daiya n'daataa daiyá rey yeⁿ'e yáⁿ'āa Egipto.

25 Naati Moisés miiⁿ neⁿ'e sa 'cueenu ca sá cuuvi ndúúcū 'iiⁿ'yāⁿ chi yeⁿ'e Ndyuūs. Ní nguéé 'cuūⁿ sa chi yeenú sa 'áámá tiempo ndúúcū vaadī yeenú chi dinuuⁿndi sa.

26 Ní Moisés miiⁿ nadacádíínuuⁿ sa chi n'daacā ca chi 'cueenu sa cuuvi tan'dúúcā chi ch'eenu Cristo chiī na yáⁿ'āa 'cúū ní nguéé ti chí cuuví yeⁿ'e sa tanducuéⁿ'ē vaadī 'cuiica chi vέé na yáⁿ'āa Egipto. Ní 'tíicā nacádíínuuⁿ sa caati deenu sa chi Ndyuūs caⁿ'á yā ca'a yā chi vέé chi cuuvi yeⁿ'e sa.

27 Ní cáávā chi Moisés i'téenu sa Ndyuūs, nan'dáa sa yeⁿe yáⁿ'āa Egipto ní nguée 'va'a sa chi nduuvu taaⁿ rey. Ní dítu canee sa chi i'téenu sa Ndyuūs tan'dúúcā chi n'diichi sa Ndyuūs 'áará chi nguée inaaⁿ sa Ndyuūs.

28 Ní cáávā chi Moisés i'téenu sa Ndyuūs s'neeⁿ sa orden yeⁿe 'viicu pascua chi 'iiⁿ'yāⁿ canéé chí s'neéⁿ yā yuūúⁿ yeⁿe 'iiti cuūchī na cheendī va'ai yeⁿ'é yā caati taachi ndaa ángel chi n'giiⁿ'nuⁿ yā nducyaaca da'caīyāa saⁿ'ā chi vmnááⁿ vmnaaⁿ, nguée cuuvi 'caaⁿ'núⁿ yā da'caīyāa chi yeⁿ'é ndaata yeⁿ'é Israel.

29 Ní cáávā 'iiⁿ'yāⁿ yeⁿe ndaata Israel i'téenu yā Ndyuūs, chicho'ó yā naavtaⁿ'ā yeⁿe mar chi nguuvu Rojo ní ngiicá yā ndii yáⁿ'āa cuūⁿmáⁿ. Ní cuayivi ní taachi cho'o 'iiⁿ'yāⁿ s'eeⁿ yeⁿe yáⁿ'āa Egipto tuu'mi ní chí'i nuūⁿnīⁿ 'iiⁿ'yāⁿ ní nducyaaca yā ch'īi yā ti nduuvidaāⁿmáⁿ nuūⁿnīⁿ.

30 Ní cáávā 'iiⁿ'yāⁿ yeⁿe ndaata Israel i'téenu yā Ndyuūs, cheⁿe yā nuuⁿmaⁿ ndiivi cheētī yeⁿe yāāⁿ Jericó ndēchē nguuvi. Tuu'mi ní ch'īinu miiⁿ ní chíndēēve cheētī yeⁿe yāāⁿ miiⁿ.

31 Ní cáávā chi Rahab i'téenu tá Ndyuūs, ní 'áará chi cueⁿe tá ndúúcū saⁿ'ā s'eeⁿ, nguée ch'īi tá ndúúcū 'iiⁿ'yāⁿ s'eeⁿ yeⁿe yāāⁿ yeⁿe tá chi nguée i'téenu yā Ndyuūs; ti n'daata miiⁿ ní sta'a tá saⁿ'ā s'eeⁿ yeⁿe Israel. Ní n'daacā idiiⁿ tá ndúúcū saⁿ'ā s'eeⁿ chí 'dííⁿ 'dííⁿ ndaá yā nguaaⁿ 'iiⁿ'yāⁿ yeⁿe tá chí cuuvi deenú yā táácā canee 'iiⁿ'yāⁿ yeⁿe tá.

32 Maaⁿ ní ¿de'ē cá cuuví caaⁿ'máⁿ ndís'tií? Nguée véé tiempo chí cuuví ndís'tií yeⁿe saⁿ'ā Gedeón ní yeⁿe saⁿ'ā Barac, ní yeⁿe saⁿ'ā Sansón, ní yeⁿe saⁿ'ā

Jefté, ní ye^{n'e} sa^{n'ā} David, ní ye^{n'e} sa^{n'ā} Samuel, ní ye^{n'e} sa^{n'ā} profetas chi candεε nduudu ye^{n'é} Ndyuūs.

³³ Nducyaaca 'ii^{n'yā}n s'eeⁿ ní cáávā chi i'téénu yā Ndyuūs idiiⁿ caandá yā ní cuchεé yā ye^{n'e} ná^{n'ā} países. Ní n'daacā nga^{n'a} nti^{nnyu}n yā ye^{n'e} taná^{n'ā} yáāⁿ. Ní tuneéⁿ yā chí Ndyuūs nga^{n'a} yā chíⁿ chí ca'a yā. Ní diⁿ yā chi nduūdi cheendi 'yáí^{nyā}n cuá'aá.

³⁴ Ní ya^{n'ā} chi diitu n'dái ngiichi nguéé cuuvi 'tuuvi 'ii^{n'yā}n s'eeⁿ chi i'téénu yā Ndyuūs. Ní n'géénu yā ye^{n'e} 'ii^{n'yā}n chi ne^{n'é} yā 'caa^{n'nú}n yā 'yā ndúúcu machete chi 'caāiⁿ ndúú 'uuvi lados. Ní 'áará chi duūvá yā ditiinú yā. Ní taachi diiⁿ caandá yā ní ditiinú yā chí 'caa^{n'nú}n yā. Ní chεε yā ye^{n'e} n'deee n'dái soldados ye^{n'e} enemigos ye^{n'é} yā.

³⁵ Ní cáávā chi n'daataa s'eeⁿ i'téénu yā Ndyuūs, nta'á yā tiná^{n'ā} chi n'dii ye^{n'e} familia ye^{n'é} yā taachi 'aā nduuchí yā ye^{n'e} nguaaⁿ tiná^{n'ā}. Ní ná^{n'ā} 'ii^{n'yā}n ch'éénu yā chii ní ch'íi yā. Ní nguéé 'cūuⁿ yā chi nngua^{n'ai} yā ti ne^{n'é} yā n'diichí yā táámá vida chi n'daacā ca.

³⁶ Ná^{n'a} yā ní 'ii^{n'yā}n s'eeⁿ duuchí yā ye^{n'e} yā ní ch'e^{n'é} yā 'ii^{n'yā}n. Ní ná^{n'a} yā ní 'ii^{n'yā}n s'eeⁿ ch'εē chiichí yā ndúúcu cadenas ní che^{n'é} yā vácū.

³⁷ Ní ná^{n'a} yā ní 'ii^{n'yā}n s'eeⁿ ca'a tuūú yā 'ii^{n'yā}n ní ch'íi yā. Ní ná^{n'a} yā ní 'ii^{n'yā}n s'eeⁿ n'deé yā nduu 'uuvi taaⁿ yā ndúúcu cierra. Ní ná^{n'a} yā 'ii^{n'yā}n s'eeⁿ n'gii^{n'nu}n yā 'ii^{n'yā}n ndúúcu machete chi 'úúví lados 'caāiⁿ. Ná^{n'a} yā ní ch'εē chiicá yā ndíi 'muuⁿ ndíi miiⁿ ndúúcu catecai yā ye^{n'e} 'iiti cuūchí ní ye^{n'e} diiⁿmaⁿ chivo. Ní pobre yā ní ch'eenú yā chíi. Ní nguéé din'daacá 'ii^{n'yā}n s'eeⁿ ndúúcu yā.

38 Ní 'iiⁿyāⁿ chi ch'eenú yā chiī cáávā chi i'téenu yā Ndyuūs, 'iiⁿyāⁿ yeⁿ'e íⁿ'yeeⁿdī nguéeⁿ n'daacā ca chi cuuvi cūneeⁿ yā ndúúcu yā. 'Iiⁿyāⁿ chi i'téenu yā ngeⁿ'é yā 'muuⁿ ngeⁿ'é yā miiⁿ ní tan'dúúcā 'iiⁿyāⁿ chi nguéeⁿ vaacú yā, 'tiicá yā. Chiicá yā yáⁿ'āa cuuⁿmaⁿ naachi nguéeⁿ ch'εtinéeⁿ 'iiⁿyāⁿ. Ní chiicá yā na cuéétí ní ná yiivi yáává yeⁿ'e 'iiti o yiivi yáⁿ'āa naachi 'cuεtinéeⁿ yā.

39 Cáávā chi 'iiⁿyāⁿ s'eeⁿ chi i'téenu yā Ndyuūs, n'dai yā ndúúcū nducuéⁿ'ē chi Ndyuūs 'cūuⁿ yā chi n'geenu yā ngii ndíi tiempo chi ch'iī yā. 'Āā cuéeⁿ cuta'a yā chi cuuvi yeⁿ'e yā chi Ndyuūs caⁿ'a yā chi ca'a yā,

40 caati Ndyuūs nadacádíinuⁿ yā chi caⁿ'á yā diiⁿ yā chi n'daacā ca cááva yā ní cáávā s'uuúⁿ. 'Iiⁿyāⁿ s'eeⁿ nguéeⁿ cuuvi cuta'á yā chi cuuvi yeⁿ'é yā ndíi tiempo chi s'uuúⁿ cuuvi cuta'a yú chi cuuvi yeⁿ'e yú.

12

Cueⁿ'e daāⁿmaⁿ snaaⁿ yú yeⁿ'e Jesús

1 Maaⁿ ní deenu yú cáávā vida yeⁿ'ē n'deeⁿ n'dái 'iiⁿyāⁿ chí ch'iī yā ti ch'iⁿ'í yā s'uuúⁿ táácā cuuvi cu'teenu ca yú Ndyuūs. Ní cáávā chuū canee chi cū'neeⁿ yú tanducuéⁿ'ē dendu'ū chi di'vaachi s'uuúⁿ ndúúcū nuuⁿndi chi diiⁿ yú caati nuuⁿndi míiⁿ diiⁿ chí cuuvi ndai yú. Ní caānu yú ndúúcū ngiīnū carrera yeⁿ'e vida yeⁿ'ē yú chi Ndyuūs itée yā s'uuúⁿ.

2 Ní cueⁿ'e daāⁿmāⁿ snaaⁿ yú Jesús ti diiⁿ yā chi cuuvi i'téenu yú 'yā. Ní diiⁿ yā chi n'daacā ca cuuvi cu'teenu yú. Jesucristo ní ch'eenú yā chiī

taachi ch'iī yā na cruz. Ní nguée dííⁿ yā cuenta chi 'cuinaáⁿ yā cucááⁿ chi ch'iī yā tan'dúúⁿcā chi n'giiⁿ'nuⁿ yā 'iiⁿ'yāⁿ caati deenú yā chi yeenú yā cuayivi ti cuuví nadanguáⁿ'ai yā 'iiⁿ'yāⁿ. Maaⁿ ní vεé yā na lado yeⁿ'e honor yeⁿ'e trono yeⁿ'e Ndyuūs.

³ Ndís'tiī, nadacadíⁿnuuⁿ nī tan'dúúⁿcā Jesucristo chi ejemplo yeⁿ'e yú. Ch'eenú yā chiī cucááⁿ 'iiⁿ'yāⁿ s'eeⁿ chi dinuuⁿndí yā. Ní 'íicú ndís'tiī nguée cuuvi 'daan'dí nī ní nguée s'neéⁿ nī chiiⁿ chi i'téenu nī.

⁴ Ndís'tiī ní 'āā chichεε nī ndúúⁿcū nuūⁿndí ní nguée ch'eenú nī chii ndíⁿ chi 'āā n'dīi nī.

⁵ ¿'Āā nguée n'gaacú ndís'tiī consejo chi Ndyuūs ca'á yā ndís'tiī chi daiyá yā? Canée nguūⁿ na libro yeⁿ'é Ndyuūs 'tíicā:

Díi, daiyá, nguée nadacadíⁿnuuⁿ nī chi nguée de'ε vεε taachi Ndyuūs dííⁿ yā castigar ndís'tiī caati cuuvi deenú nī chi nguée n'daacā idiíⁿ nī. Ní nguée ndaacadáámí nī yeⁿ'é yā taachi dííⁿ yā castigar ndís'tiī.

⁶ Señor yeⁿ'e yú yaa'vineéⁿ yā nducyáácá 'iiⁿ'yāⁿ chi neⁿ'é yā ní dííⁿ yā castigar nducyaaca 'iiⁿ'yāⁿ chi sta'á yā chi cuuvi daiyá yā.

⁷ Maaⁿ ní cuchεε nī castigo chi Ndyuūs itée yā ndís'tiī ti Ndyuūs ní chiidá nī. Taachi n'geenú nī ngii tuu'mi ní deenú nī chi dííⁿ yā ndúúⁿcū ndís'tiī tan'dúúⁿcā chi ndís'tiī ní daiyá yā. 'Tíicā dííⁿ yā. ¿Dú'ū daiyá yā vεε chi chiidá yā nguée idiíⁿ yā castigar?

⁸ Nduuti chi Ndyuūs nguée dííⁿ yā castigar ndís'tiī tan'dúúⁿcā chi dííⁿ yā castigar nducuéⁿ'ē daiyá yā, tuu'mi ní ndís'tiī nguée maaⁿ daiyá yā ti ndís'tiī ní

daiyá yeⁿe táamá yā. Ní nguée daiya Dendyuūs ndís'tiī.

⁹ Ní 'tiicá ntúūⁿ chiida yú chi yeⁿe iⁿ'yeeⁿdí 'cūū diíⁿ yā castigar s'uuúⁿ tan'dúúcā chi neⁿ'é yā. Ní s'uuúⁿ ní dinéⁿe yú chiida yú. N'daacā ca chi diiⁿ yú chiiⁿ chi neⁿ'e Ndyuūs chi canée na va'ai chεeti nguuvi ní sндуuchi yú.

¹⁰ Chiida yú chi yeⁿ'ē iⁿ'yeeⁿdí 'cūū diíⁿ yā castigar s'uuúⁿ dúu'vī nduuyū nūuⁿ tan'dúúcā chi tumi-cadínnuuⁿ yā chi n'daacā caavā s'uuúⁿ. Ndyuūs yeⁿ'e yú ní diíⁿ yā castigar s'uuúⁿ ti cuáácú chí n'dai caavā s'uuúⁿ ti s'uuúⁿ ní cuuvi din'dai ca yú tan'dúúcā chi Ndyuūs ní n'dai cá yā.

¹¹ Cuaacu chi nguée yeenu yú taachi téé yā castigo s'uuúⁿ naati yá'ai yú. Cuayiivi ní 'iiⁿ'yāⁿ chi tuumicadínnuuⁿ yā yeⁿ'ē castigo yeⁿ'é yā ní véé chi n'daacā yeⁿ'e castigo. 'Iiⁿ'yāⁿ s'eeⁿ din'daacā cá yā ní canée 'diiⁿ vida yeⁿ'é yā.

Vée peligro yeⁿ'ē yú nduuti chi nguée n'giindiveeⁿ yú nduudu yeⁿ'é Ndyuūs

¹² Maaⁿ ní Ndyuūs 'āā tee yā castigo ndís'tiī ní maaⁿ ní cuta'á nī fuerzas ndúúcū ta'á nī ní dīcuaacú nī duūⁿntii'yá nī chi ndicuūnū.

¹³ Cachiicá nī ná yúúní cuaacu maaⁿ ní 'íicú cuuvi nanduūvā yeⁿ'é nī ca'a nī chi ndíí dúúvá yeⁿ'e nī.

¹⁴ Maaⁿ ndís'tiī ní diíⁿ nī chi 'diiíⁿ 'cuεetinée nī ndúúcū nducyaaca 'iiⁿ'yāⁿ. Ní diíⁿ nī nducuéⁿ'ē chi n'daacā ca caati dεεvε canée vida yeⁿ'é nī. 'Iiⁿ'yāⁿ chi nguée dεεvε vida yeⁿ'é yā nguée cuuvi n'diichí yā Señor Ndyuūs.

¹⁵ Cundée nī cuidado chi mar 'áámá ndís'tiī nguée divíí nī yeⁿ'e Ndyuūs ti nguée cuuvi inneé yā

ndís'tiī. Ní nguée cúúví cunee 'aamá nī nguaaⁿ ndís'tiī chi tan'dúúcā 'áámá dii'yu yaātā yaāa chi diiⁿ daño yeⁿe nducuéⁿē dii'yu yaātā. 'Tíicā cuuvi diiⁿ daño 'áámá nī tan'dúúcā chi veneno nguaaⁿ ndís'tiī.

¹⁶ Candéε nī cuidado chi mar 'áámá ndís'tiī nguée caⁿá nī ndúúcū n'daataá o saⁿā chi nguée yeⁿe nī. Ní nguée diiⁿ nī cuenta yeⁿe nducuéⁿē chi yeⁿé Ndyuūs. 'Tíicā diiⁿ saⁿā Esaú ti cáávā 'áámá comida nūuⁿ n'diicuí sá chi cuuvi yeⁿe sa ti saⁿā vmnaaⁿ.

¹⁷ Ní ndís'tiī deenú nī yeⁿe saⁿā Esaú taachi neⁿe sa cuta'a sa yeⁿe chiidá sa chi cuuvi yeⁿē sa ti saⁿā daiya vmnaaⁿ, naati nguée 'cuūⁿ chiida sa. Ní Esaú chεēcū taavi sá ní n'nuuⁿ sa manera chi nduuví n'daacā chi 'āā diiⁿ sa naati nguée ndaācā n'daaca sa.

¹⁸ Maaⁿ ní ndís'tiī nguée ndāa nī na yiīcū chi ngiichi chi diiⁿ nī sentir ngiichi miiⁿ, tan'dúúcū chi diiⁿ 'iiⁿyāⁿ Israel tiempo chi 'āā chó'ōo. Ndíí nguée diiⁿ nī sentir maāiⁿ, ndíí nguée ndúú meēeⁿ, ndíí nguée ndúú 'áámá cheeⁿ cúúví díítūu.

¹⁹ Ní nguée n'giindiveéⁿ nī chi ch'εēcū trompeta miiⁿ ní nguée nduudu yeⁿé Ndyuūs chi caⁿa yā ndúúcū 'iiⁿyāⁿ s'eeⁿ. Taachí 'iiⁿyāⁿ s'eeⁿ ch'iindiveéⁿ yā nduudu yeⁿe Ndyuūs chiica yā Ndyuūs chi 'āā ntée caaⁿmaⁿ cá yā 'iiⁿyāⁿ s'eeⁿ.

²⁰ 'Tíicā ngaⁿa yā ti nguée cuuvi chεε yā chi Ndyuūs ngaⁿa ntiīnyuⁿ yā ti 'tíicā: Ndúúti chi 'áámá 'iiti nindaá tī na yiīcu 'cūū canee chi cuiituú yā 'iiti ní 'caaⁿnúⁿ yā 'iiti.

²¹ Ní maaⁿ Moisés miiⁿ ní taachi n'diichí yā yiīcu 'cūū ní ch'iindiveéⁿ yā nducuéⁿē, 'tíicā ngaⁿá yā: Nééne 'va'á ní yiin'duuvi 'úú.

22 Maaⁿ ní nguée 'tíicā ti ndís'tiī ndaa nī 'áámá yīicū chi nguuvi Sión chi yáāⁿ yeⁿ'e Ndyuūs chi cánduuchi chí yáāⁿ Jerusalén chí va'ai chεeti nguuvi naachi n'deee n'dái miles ángeles snée yā.

23 Ní nduuidaamá yā chi dich'εεté yā Ndyuūs. Ní miiⁿ canee nducyaaca 'iiⁿ'yāⁿ chi daiyá Ndyuūs. Ní chi duuchí yā canée nguūⁿ na libro yeⁿ'ē va'ai chεeti nguuvi. Nducyaaca nī ndaa nī nanááⁿ Ndyuūs chí diíⁿ yā juzgar nducyáácá 'iiⁿ'yāⁿ. Ní ndís'tiī chí yeⁿ'ē iⁿ'yeeⁿdí 'cūū ní ndaa nī nanááⁿ espíritu s'eeⁿ yeⁿ'e 'iiⁿ'yāⁿ chí dεεε ca chí Ndyuūs diíⁿ yā chí nguée nuuⁿndi yeⁿ'é yā.

24 Ní ndaa nī nanááⁿ Jesucristo chí abogado chí canúuⁿ yā naavtaⁿ'ā compromiso chí ngai chí yeⁿ'é Ndyuūs ndúúcū 'iiⁿ'yāⁿ. Ní ndaa nī nanááⁿ Cristo chí chingée yā yuūúⁿ yeⁿ'é yā cucáávā s'uuúⁿ. Yuūúⁿ yeⁿ'e Cristo ní n'daacā ca nguée ti yuūúⁿ yeⁿ'e Abel. Ndúúcū yuūúⁿ yeⁿ'e Cristo, Ndyuūs nadich'εεcú yā nuuⁿndi yeⁿ'e 'iiⁿ'yāⁿ. Naati cáávā 'díínu Abel ch'iiⁿ'núⁿ Abel tuuⁿ'mi ní Ndyuūs ca'a yā castigo 'díínu Abel.

25 Ní cáávā nducuéⁿ'ē chuū candéé nī cuidado chí n'giindiveéⁿ nī nduudu yeⁿ'e Ndyuūs chí ngaⁿ'á yā ngī yā ndís'tiī. 'Iiⁿ'yāⁿ s'eeⁿ chí nguée ch'iindiveéⁿ yā nduudu yeⁿ'e Cristo taachí snée yā iⁿ'yeeⁿdí 'cūū nguée nguaⁿ'ái yā yeⁿ'ē nuuⁿndi yeⁿ'é yā. Ní 'tεε cá s'uuúⁿ chí cuuvi nguaⁿ'āī yú nduuti chí ndaa-cadaami yú yeⁿ'é Cristo chí canee na va'ai chεeti nguuvi ní ngaⁿ'á yā ndúúcū s'uuúⁿ yeⁿ'e chí cuchiī.

26 Tiempo chí chó'ōo taachi Ndyuūs ngaⁿ'á yā yeⁿ'e yīicū nuⁿ'u yáⁿ'āa. Maaⁿ ní Ndyuūs ngaⁿ'á yā 'tíicā: Taama vmnéⁿ'ēe inuⁿ'ú yáⁿ'āa ndúúcū nanguuvi.

27 Maaⁿ ní taachi ngaⁿ'a Ndyuūs taama vmnéⁿ'ēe nūⁿ deenu yú chi nducuéⁿ'ē chi din'dái Ndyuūs ní caⁿ'á yā din'núⁿ'u yā ní divíi yā. Ní nducuéⁿ'ē chi nguéeⁿ din'núⁿ'u yā ní cūnee.

28 Canée chí ca'a yú gracias Ndyuūs caati véé yáāⁿ yeⁿ'e yú, lugar naachi Ndyuūs ngaⁿ'a ntiiⁿnyuⁿ yā. Ní nguéeⁿ cuuví nuⁿ'u lugar miiⁿ. Caneé chí dich'εεε yú Ndyuūs ní i'teenu yú Ndyuūs. Ní 'va'a yú yeⁿ'é yā ní diiⁿ yú tan'dúúⁿcā chí neⁿ'e yā.

29 Ndyuūs yeⁿ'e yú tan'dúúⁿcā 'áámá nguuchi yáⁿ'ā chí dituūví nducuéⁿ'ē chí nguéeⁿ n'daacā. Tiicá yā.

13

Yeⁿ'é chí diiⁿ yú chí cunee yiinuú Ndyuūs

1 Canée chí dineⁿ'e yú 'aama yú taama yú caati hermanos s'uuúⁿ ní yeⁿ'e Cristo s'uuúⁿ.

2 Nan'gaacu yú chí canee chí ca'a yú va'aī yeⁿ'e yú 'iiⁿ'yāⁿ chí canúúⁿ yúúⁿí. N'duuví yā ní diiⁿ yā 'túúⁿcā ní sta'á yā va'ai yā ángeles ní nguéeⁿ déénu yā chí ángeles.

3 Nan'gaacu yú yeⁿ'e 'iiⁿ'yāⁿ chí snúúⁿ yā vácūū. Diiⁿ yú cuenta chí s'uuúⁿ snuūⁿ yú vácūū nduucú yā. Nan'gaacu yú yeⁿ'e 'iiⁿ'yāⁿ chí n'geenú yā ngii na cuerpo yeⁿ'é yā ní diiⁿ yú cuenta chí s'uuúⁿ ní n'geenu yú ngii na cuerpo yeⁿ'e yú nduucú yā.

4 Diiⁿ yú respetar 'iiⁿ'yāⁿ chí n'giindivaacú yā ti nguéeⁿ dinuuⁿndí yā. 'Iiⁿ'yāⁿ chí n'giindivaacú yā canee chí caⁿ'á yā dámaāⁿ ndúúⁿcū isaⁿ'ā o n'daataá yeⁿ'é yā. Ndyuūs ní n'diichí yā nuuⁿndi yeⁿ'e 'iiⁿ'yāⁿ chí véé nuuⁿndi yeⁿ'é yā ndúúⁿcū 'iiⁿ'yāⁿ

chi n'giindivaacú yā ní ca'n'á yā ndúúcū táámá n'daataá o sa'n'á.

⁵ Nguéé dineⁿe yú tuūmī naati yeenú yú ndúúcū chi véé chi yeⁿe yú ti Ndyuūs nga'n'á yā 'tíicā: 'Úú nguéé cu'neéⁿ ndís'tiī ní nguéé diíⁿ abandonar ndís'tiī.

⁶ Ní 'tíicā cuuvi caa'n'maⁿ cuaacu yú ndúúcū confianza:

Señor ní nginne yā 'úú. 'Úú nguéé 'va'á yeⁿe chi 'iiⁿyāⁿ cuuvi diíⁿ yā nduucú.

⁷ Nan'gaacú nī yeⁿe 'iiⁿyāⁿ n'gεεε yeⁿe yaācū chi nga'n'a ntiiⁿnyúⁿ yā nanááⁿ ndís'tiī ní nga'n'á yā ngii yā ndís'tiī nduudu cuaacu yeⁿ'é Ndyuūs. Nada-cadíínuuⁿ nī tááca 'iiⁿyāⁿ s'eeⁿ diíⁿ yā ní n'gεεtineé yā ní ch'ti yā. Maaⁿ ní candéε nī cuidado chi diíⁿ nī tan'dúúcā 'iiⁿyāⁿ n'gεεε chi i'téenu yā Ndyuūs diíⁿ yā ti 'iiⁿyāⁿ s'eeⁿ ejemplo yeⁿ'é nī.

⁸ Jesucristo miiⁿ ní 'āā 'tiicá nūⁿ tan'duucá yā 'iicu, 'tiicá ntúuⁿ yā maaⁿnguuvi. 'Āā 'tiica nuúⁿ yā cueⁿe daāⁿmaⁿ.

⁹ Cuin'diichí nī ndís'tiī. Nguéé 'caandiveéⁿ nī ndúúdu 'na'n'a chi n'dááⁿ ndúúcū yeⁿ'é chi che'e yú. N'daacā ca chi staava yeⁿ'é nī canéé n'daacā chi cuuvi cuta'á nī fuerzas yeⁿ'é nducuéⁿ'é chi n'dai taavi chi Ndyuūs itée yā ndís'tiī. Staava yeⁿ'é 'iiⁿyāⁿ nguéé diíⁿ aprovechar nduuti chi chiindiveéⁿ yā nduudu n'dááⁿ ndúúcū yeⁿ'e chi che'e yú.

¹⁰ Deenu yú chi chiiduú s'eeⁿ chi diíⁿ yā ntiiⁿnyuⁿ yeⁿ'e yaācū yeⁿ'é yā nguéé cuuvi che'é yā yuūtē yeⁿ'e nátaí yeⁿ'e 'iiti chi ch'iiⁿnúⁿ yā cáávā ofrenda yeⁿ'e yú ti ofrenda yeⁿ'e yú ní 'āā vi'í caā ti i'teenu yú Jesucristo. Ní Jesucristo miiⁿ ní ch'ti yā chi lado yeⁿ'e ofrenda yeⁿ'e yú.

11 Chiiduú ch'εετε ca yeⁿe judíos chi Israel s'eeⁿ taachi ch'iiⁿnúⁿ yā 'iiti cáávā ofrenda yeⁿe nuūⁿndī candέε yā yuúúⁿ yeⁿ'é 'iiti chεεti cuarto chi nguuvu Dεεvε naati cuerpo yeⁿ'ē 'iiti miiⁿ ní ngiichí yā 'áámá lado yeⁿ'ē yáāⁿ yeⁿ'é yā.

12 Ní 'tiicá ntūūⁿ Jesucristo ch'īi yā cuaaⁿ dáámí cheendi va'āī yeⁿe yáāⁿ Jerusalén ní 'íicú cuuvi dεεvé yā 'iiⁿ'yāⁿ yeⁿe nuuⁿndi yeⁿ'é yā ndúúⁿcū yuuúⁿ yeⁿ'e maáⁿ yā.

13 Maaⁿ ní caⁿ'a yú tan'dúúⁿcā chi cueⁿ'e Jesús 'áámá lado yeⁿ'ē yáāⁿ ní 'cueenu yú cuuvi tan'dúúⁿcā chi ch'eenú yā chiī ní cuuvi 'cuinaaⁿ yú tan'dúúⁿcā chi 'cuinaáⁿ yā.

14 Caati nguéé véé 'áámá yáāⁿ chi 'áámá cūnee cáávā s'uuúⁿ naati in'nuuⁿ yú 'áámá yáāⁿ ch'εετε chi 'áámá cūnee chi véé tiempo chi cuchī.

15 Ní cáávā chuū canee yú chi dich'εετε yú Ndyuūs cucáávā Jesucristo. Ní taachi dich'εετε yú Ndyuūs chuū ní ofrenda chi canee chi ca'a yú Ndyuūs. Ní canéé chi ca'a yú gracias Ndyuūs cáávā Jesucristo ndúúⁿcū nduudu yeⁿ'ē yú.

16 Nguéé cuuvi 'náaⁿ nī chi din'daacá nī ní nneé nī 'aamá nī taamá nī caati chuū ní ofrenda yeⁿ'é nī chi 'túúⁿcā Ndyuūs neⁿ'e yā.

17 Cu'neeⁿveéⁿ nī nduudu yeⁿ'é 'iiⁿ'yāⁿ chi ngaⁿ'a ntiiⁿnyuⁿ yeⁿ'é nī. Cu'téenu nī yeⁿ'é yā chi ngaⁿ'a yā caati 'iiⁿ'yāⁿ s'eeⁿ diíⁿ yā cuidado yeⁿ'ē staava yeⁿ'é nī. 'Iiⁿ'yāⁿ s'eeⁿ canéé chi nca'á yā cuenta nanááⁿ Ndyuūs yeⁿ'ē ntiiⁿnyuⁿ chi diíⁿ yā. Diíⁿ núúⁿ yiiⁿnu nī chi ngaⁿ'a yā caati yeenú yā diíⁿ yā ntiiⁿnyuⁿ yeⁿ'é yā. Ti nduuti chi nguéé diíⁿ nī 'túúⁿcā nguéé yeenú yā ní nguéé diíⁿ nī aprovechar yeⁿ'ē

ntiiⁿnyuⁿ chi diíⁿ yā cáávā ndís'tiī.

18 Maaⁿ ní caaⁿmaⁿngua'á nī cáávā nús'uu ti nadacadiinúúⁿ 'nū n'daacā na staava yeⁿ'é 'nū ní neⁿ'é 'nū 'cuεεtinéé n'daacá 'nū yeⁿ'e nducuéⁿ'ē dendu'ū.

19 'Úú ngiicá ndís'tiī chi taachi ngaⁿ'angua'á nī, ngiicá nī Ndyuūs chi téé yā lugar 'nū chi niiⁿnuúⁿ nūuⁿ cuuví nandaá ní cuneé ndúúcū ndís'tiī.

Dì'viicú yā ndís'tiī ní dicho'ó yā, n'dai ndís'tiī

20 Maaⁿ ní Ndyuūs ní yeⁿ'ē vaadī 'diiⁿ, maaⁿ Ndyuūs miiⁿ nadin'duuchí yā Jesucristo yeⁿ'ē yú yeⁿ'ē nguaaⁿ tináⁿ'ā chi Jesucristo miiⁿ Pastor chi ch'εεte n'dai chi diíⁿ yā cuidado s'uuúⁿ chi tan'dúúcā 'iiti cuūchī yeⁿ'é yā. Ní Jesucristo yeⁿ'ē yú ndúúcū yuúúⁿ yeⁿ'é yā diíⁿ yā chi 'áámá cūnee compromiso chi Ndyuūs diíⁿ yā ndúúcū 'iiⁿyāⁿ.

21 Neⁿ'é chi Ndyuūs yeⁿ'e vaadī 'diiⁿ téé yā ndís'tiī nducuéⁿ'ē chi n'dai yeⁿ'é yā chi nguéé yeⁿ'é nī. Ní cuuvi n'daí nī ti ndís'tiī cuuvi diíⁿ nī chiiⁿ chi neⁿ'é Ndyuūs chi diíⁿ nī. Ní neⁿ'é chi Ndyuūs diíⁿ yā cáávā nducyaaca yú nducuéⁿ'ē chi neⁿ'é yā diíⁿ yā cáávā Jesucristo. Caⁿ'a yú chi ch'εεte ca canéé Cristo ní n'dεεvé ngii yā cuéⁿ'é daāⁿmaⁿ cuen'e daāⁿmaⁿ. 'Tíicā.

22 Ndís'tiī hermanos yeⁿ'é ngiicá ndís'tiī chí cuchéé nī ndúúcū nduudu chi ngi'cueéⁿ ti nguéé 'yaaⁿ idinguúⁿ na carta miiⁿ yeⁿ'é ndís'tiī.

23 Yaa'ví ndís'tiī chi cadiinúúⁿ nī chi Timoteo hermano yeⁿ'ē yú 'āā ntéé canee sa vácūū. Ní ndúúti chí niiⁿnuⁿ niiⁿnuⁿ ndaa sa nanáaⁿ 'úú tuu'mi 'úú ní candéé saⁿ'ā taachi ndaa nanáaⁿ ndís'tiī ní n'diichí ndís'tiī.

²⁴ Maaⁿ ní caaⁿ'máⁿ nī 'iiⁿ'yāⁿ chi ngaⁿ'a ntiiⁿnyuⁿ yeⁿ'é nī ndúú^{cū} nducyaaca 'iiⁿ'yāⁿ chi i'téenu yā Jesucristo: N'daí ndís'tiī, caaⁿ'máⁿ nī. 'Iiⁿ'yāⁿ yeⁿ'e país Italia: N'daí ndís'tiī, ngaⁿ'a yā.

²⁵ Neⁿ'é chi Ndyuūs téé yā nducyaaca ndís'tiī nducuéⁿ'ē vaadī n'dai yeⁿ'é yā. 'Tíicā cuuvi.

**Nduudu n'dai ye^{n'}e Ndyuūs ye^{n'}e cuicateco
ye^{n'}e Tepeuxila
New Testament in Cuicatec, Tepeuxila
(MX:cux:Cuicatec, Tepeuxila)**

copyright © 1974 Wycliffe Bible Translators, Inc.

Language: Cuicatec, Tepeuxila

Translation by: Wycliffe Bible Translators, Inc.

Cuicateco, Tepeuxila [cux], Mexico

Copyright Information

© 1974, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Tepeuxila

© 1974, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022

28b090dc-326e-56c7-994e-5d3354d1d54f